

汲古堂集卷之二十

東甌何白无咎著

七言排律

觀女劇

絲帳蓮燈爛九微
離雲璧月故依依
迴翔鸞影秦王女
離合神光洛水妃
冠側霧鬟留綽約
墨殘星靨失容輝
迴風林葉紛交集
變徵梁塵欲倒飛
客盡桂尊歌既醉
主更瑤席賦無歸
門前露白宮槐濕
城上烏嗁曙漏稀

泛舟至高坡訪林翼之林仲一兄弟因游
陶公洞赤水洞諸勝
題書遠問白雲期弭棹江干候晚曦脩竹數家
開窅窳晴沙一徑入逶迤閣憑樹杪遙看野泉
繞松間細入池耕鑿衣冠饒古意渾淪真率亦
吾師風流兄弟同岑氏隈隩谿山入羨陂淺瀨
低徊飛鷺鷺碧潭深黑動蛟螭春原曳杖林光
映石壁題詩海月窺行踏落花嘶紫燕幾停垂
柳聽黃鸝金庭遍歷仙人窟雪竇疑窺織女絲

有客上方吹鍊篴奚奴隨地佩鴟夷山靈豈惜
千秋閼陰洞真探二酉遺十日襟期成汗漫中
宵風雨對淒其贈君自掇金鷺蒞別去長懷玉
樹枝明日停雲江上櫂也應回首意遲遲

冬夜偕季中過君御知白齋同用南字

山齋返照逗晴嵐晻靄林光暝色涵目送歸鴻
愁宵宵影隨孤鶴髣髴貧交轉向窮年戀名
理還從丙夜談人倚冰壺雙碧映圖開雪竇萬
峯含雕琴匣底閒流水寶籙牀頭亂玉函翦燭

頻呼烹露非停觴屢爲破霜柑行歌草澤吾差
適作吏風塵爾不堪處陸直教深偃蹇服箱寧
復較驂驪殺青已擬龍門令知白還希柱下聃
拙且循時同吹萬巧難調世類朝三行邊幽意
扶桃竹醉裏雄心拂劔鐔同是乾坤皆帝澤肯
將詞賦怨湘潭昔賢陳跡時興慨於粵名山幾
共探今古永嘉形勝地遷來不似瘴江南

贈李本寧太史一百韻時予入楚訪太史
於郢上將有武當之游并及之

王風蔓草久荒蕪正始誰操兩漢觚豈乏頽波

迴砥柱公從元化運冥樞九河沙汰稱東魯

萬象微茫見大吳元美俎豆雍容歸下雉明卿玄黃

黼黻羨新都伯玉同林蘭蕙芳元合異本梗楠質

每符流水拂絃寧改聽奔霄歎玉更齊驅岱宗

不讓羣峯伏渤澥由卑衆壑趨紋濯江霞開蜀

錦胎含海月媚秦珠盛衰運每關王化雅頌誰

云匪令圖大夏諧音陳帝所列星番象麗天衢

絳河機杼絲初織青帝朝華綺乍敷垂露直疑

僊掌滴重輪仍倩喬雲扶歲蕤練實傷朱鳳歷
落晨星散白榆堂上楚妃元獨立漢臯神女一
何姝采詩乍可徵閭巷作賦由來屬大夫指點
迷津曾捨筏力排邪說類投巫藜難漢閣傳中
壘草綠湘潭弔左徒遮莫流言成積羽偶當歸
興託思鱸閒依松菊開三徑醉狎烟波長五湖
野佩菲菲攀薜荔釣竿嫋嫋拂珊瑚簪纓那復
關人事丘壑元知不負吾鄂渚樓中黃鶴馭留
侯山下赤松俱大隄烟月扶筇近南市枌榆闢

館迂先德尚存新甫柏永懷仍感舊臺烏清陰

帀地流文甃黛色叅天發故株澤較種時柯轉

茂淚滋攀處葉曾枯

太史先方伯公手植古柏猶存太史甃臺其下題曰

甫柏徵詩海內諸名家紀其事

長懷牛耳隨鞭弭擬謁龍門式

楷模已分形骸同土木漫希姓氏出菰蘆違時
偃仰窮欄下散髮行歌碧海隅橘以渡淮羞作
枳蘭因束楚化爲芻聲華豈有稱鄉曲蹤跡猶
慙溷市屠佞佛六時叅白法全生一壑養朱愚
憑陵俠負千秋骨骯髒貧餘七尺軀寧有借交

傳賦草屢逢屬和競皇琴哀歌慷慨時將晚旅
鬢刁騷歲欲徂時見一班同管豹立窮五技似
谿廳瑤華曾荅衡峯鴈尺素初憑葉縣鳧延佇
疎麻時載折浮沉遠道渺難踰踈踈奔走憐牛
馬冉冉烟霜感聽蛄招隱駕言依桂樹遠游有
事託桑弧三山曉色開殘夜萬里春光犯畏途
好藉發蒙窺浩蕩豈辭重趼歷崎嶇經時雷雨
增波浪上瀨帆檣輳舳艫菱曲忽驚聞楚調榜
歌漸已變吳歛天邊翠影看匡阜鏡裏新妝出

小姑星過豫章分翼軫江迴嶓冢合巴俞雪銷
丙穴來王鮪花落黃陵聽鷓鴣雲斷岳蓮盤紫
蓋雨殘湘竹帶蒼梧入門望近真人氣劇語心
將國士輪恍發祕函窺蔡帳如快珍鬻入郇厨
襄陽耆舊誰標的姑射神仙白雪膚此日風期
訓夙契忘年禮數展交娛華陰成市依賓從棣
萼連枝接友于雙壁乍聯看驥子五花欲就是
龍駒芙蓉初日涵秋水礪壑清冰映玉壺燁燁
謝庭皆寶樹翩翩丹穴盡鷄雛食魚無復彈孤

鋏懸杖何煩具四銖優渥賸遺仁祖米過從寒
 解謝公襦侯芭忝竊傳竒字南郭將無誚濫竽
 尊挹璫波行縹酒匙翻雲子飴雕胡樹連睥睨
 山疑墮幔卷星河月可呼客子如歸忘逆旅道
 流相對借屠蘇夜刪寶籙分芝火朝啓瑤編漱
 玉腹何草悟來非藥樹是酥覺後盡醍醐清冷
 乍吸神逾王法雨頻霑病欲蘇時予抱病寓似
 向渾淪藏意匠不從牝牡得精麤談鋒玄著羣
 言海經笥深衆說郭方外異書傳琬琰笈中

古刻辨盤盂懷賢豈擬浮湘作董道將乘泛海
 桴丹壑尚虛天上詔清時猶責握中瑜絲綸近
 簡鼇扉儁撰結重開虎觀儒自是一時尊秘典
 更誰百代贊鴻謨名山副本藏司馬良史何人
 擅董狐斧袞不無嚴筆削憲章何以盛陳鋪宏
 裁業已歸元老廣聽還應問八虞日月並懸胡
 鹵莽廟堂求舊廢諮諏時內閣議修史亡餘郢
 質斤難運絕後朱絃調轉孤濠上寂寥蒙叟歎
 鄴中代謝子桓吁定知有賦悲鄰笛更識興衰

嘅酒壚夫子同時猶及見羣公異代枉相須敢
論後進堪傳鉢差可前驅備執爻葑菲未教遺
下體範型爭擬躍洪鑪人歸藻鏡才方足品入
雌黃世莫渝松柏不聞生崕嶼蓮花獨許出泥
塗此鄉信美非吾土明德難忘拂湛盧怨別撫
時書荏苒懷歸望遠路縈紆夢驚巫女嘯猿峽
愁結秦皇繫馬蒲寔以高標深企羨兼之名岳
重踟躕登臺縱目神先邁隔水寒裳足屢濡帝
集中天玄時聳星垂北斗衆峯殊金支絳節時

明滅羽駕烟裝信有無石髓曾聞王烈采茅龍
或遇子先呼陽厓萬仞桃皆碧陰澗千年草盡
朱仙篆雷書留鳥豕金箱璇籥守熊羆獻珠何
代逢龍女守竈前身悟鶴奴聞掃天壇雲掩曖
靜窺黼帳錦模糊秩刊祀典儀尤重靈著圖經
事豈誣擷秀終期同攬結臨岐且復立須臾玉
函有待書成後預向清都選一區

題郝仲輿明府百花帳十韻

複帳流蘇四角懸冰紈丹粉故嫣然連枝並蒂

標雙豔疎蕊孤英笑獨妍珍簾頰霞搖婀娜芝
房初日照嬾娟圖開缺鯁滕王障波浴鴛鴦濯
錦川夜冷九華明絳雪朝融七寶透紅烟芳辰
詎是因春駐清影元難倩月傳氣借爐香迷艾
納色分鐙暈映銅蓮合歡長得青皇妬薦寢還
教碧玉憐握裏彩毫頻結夢林間翠羽儼游僊
將無勾漏還丹日或是河陽試宰年

吳明卿先生攜仲子臯倩入吳弔王元美
大司寇茲將西還下雉吳叔嘉集吳越

詞客四十二人會餞於虎丘座中分韻分
體贈別予分體得七言排律分韻得八齊

中原七子建安齊郢雪長寒楚水西晞髮陽阿
弄溟渤拂竿天外截虹霓漢江日湧春濤合衡
岳星垂海嶠低載向玄夷探玉簡更從秦乙乞
青藜下闕赤縣游無間上薄鴻濛宵莫稽萬象
微茫愁載筆百靈黯澹泣難犀游僊自許呼黃
鶴奉使曾聞祀碧雞佩裏陸離紛杜若握中光
恠照懸黎北山嘉木稱文梓西極名駒是馱馱

貞榦亭亭承露掌神姦獵獵迅霜蹠仲弓有子
前爲御太史詹星定聚奎真氣忽驚關令尹素
車仍渡越來谿笛因夜咽山陽感蘭爲明煎楚
客悽芳草歸人千里權斷雲垂老數行嗚洲寒
弱水傷麟鳳劔冷高柯瑩鸛鶉無復重聞廣陵
散可堪還聽白銅鞮一時騷雅含淒惻羣彥風
期惜解攜片石清壺聊俛仰上方飛觀共攀躋
龍游笠澤隨烟霧塵過香林趁鹿麋丹領桂輪
初學扇碧欄桐葉半含圭五金已失荒丘虎七

寶仍留紫座猊詞客鴈行爭挾藻歌娃鱗次旋

分題

時以歌姬白
春衫分韻

芙蓉繞郭晴嵐撲荔薜成帷

溼翠迷已覺茲游身亦幻寧辭今夕醉如泥伊
余南粵稱狂客抱甕中林學灌畦霞起芝田聊
引滿雨來菌閣愜冥棲久諳黃獨時堪煮不信
青雲自可梯象外倘能傳密義白毫光裏施摩
尼

至金斗投贈劉海日明府二十五韻

城臨金斗切星辰地挾清肥接廣津放浪尋君

廬子國風流呼我謫僊人雲霄早視秋曹草歲
月仍淹漢署薪舊識爽鳩來鸞鷲昔聞神駿得
騏驎九閣扣額名尤著三輔遺風俗載淳朗暎
清水淮旬月暖迴寒谷蜀山春諍庭漸覺爰書
簡墨苑驚看麗藻新屈戍紫烟浮鵲尾槁梧清
徵動龍唇入懷赤壁來縣圃照握明珠出大秦
猶記彤庭賦紅藥恥同枉渚怨青蘋幕中坐嘯
留公孝方外襟期間許詢下士每迎縫掖屣跂
予曾望後車塵白公堤畔游同忝蘇小墳邊跡
未湮拂柳驂騑行綠網隔花鸚鵡啜紅巾幾經
鳳曆移星紀一別龍章遂海濱啄飲真同原澤
雉浮沉難寄越江鱗羸糧悄悄泥塗遠躡屩遙
遙客路貧訪戴子猷乘雪夜依劉王粲感蕭晨
前綏出郭過逢數別館開尊慰藉頻鳧是尚方
親賜履鶴爲華表再來身旌陽道行功初滿勾
漏靈砂事已真紫府姓名書寶笈平昌仙夢紀
貞珉嚴霜爽颯逢搖落遠道遲回媿隱淪地近
西江清可挹倘因餘潤及波臣

西云李維城督護以皮林功晉秩一品奉贈三
貞雅十六韻

銀州鐵嶺控遼陽仙李蟠根奕葉光一德山河
盟帶礪三朝茅土畫封疆渥洼歎玉俱龍種雲
路同風起鴈行飛騎未須論衛霍承貂無復數
金張地浮渤海玄菟外天近勾陳紫極傍雄畧
世傳黃石秘僑聲夙負白眉良園橋弱冠推經
術上國時名溢縹緗公少游太學以寧夏之變
膺薦提兵積勞至大帥
繩武未忘良冶業起家仍縮徹侯章卽看節鉞

臨東夏已見韜鈴靖朔方特進右軍分虎旅指
撝列校屬龍驤風聞金柝宮門靜日下觚稜禁
禦長獵獵羽旂開大赤桓桓壯士選中黃芳尊
卜夜呼鸚鵡別館傳燈剪鳳凰分闈應知垂睿
想剖符遙指向炎荒山通玉壘連三蜀水合珠
江接五羊虹繞寶戈纏殺氣星流蓮鏑動寒芒
風輶采入羅施國霜斧俄清瘴癘鄉上賞早懸
關內爵長纓獨擊日南王先教種落沾皇化未
遣騷人賦國殤銘柱立收交阯績却金寧問尉

陀裝

公却土酋魏遺數千
縉中丞楊公以疏聞

車前鏡吹翻朱鷺徼

外夷歌至白狼蠻女雕盤陳桂蠹夔童碧窰送

椰漿五谿春轉畚沙綠百粵烽消嶺樹蒼鼻飲

熙熙知帝力刀耕處處紀農祥殊方貢篚通南

服都護勛名勒太常玉帶蟒衣何鳥奕金泥鸞

檢自焜熿燭銀光映鴉翎鈔宮錦清分鳳寢香

秦塞總戎曾拜命燕臺賜第日相望歡騰芹水

軍容盛氣壯榆關陣色揚白羽不傳青海箭紫

苔欲繡綠沉槍儒風雅愛羊開府石畫何如趙

破羗芍藥新聲徵北里葡萄美酒出西涼花間

張宴應宜數堂上調絲且未央自笑曹丘非上

客還同杜甫踞胡牀昔人炯戒因君獻宥座遺

規幸不忘

壽中丞崑巖先生六十初度七言排律一

百八韻

鼎湖一柱表祁僊賜谷羣峯接洞天地以妙庭

標棗館曆因軒后演瑤編神區建福扶貞運夫

子儲精應斗躔鈇鉞驅馳三出塞河湟經畧再

籌邊乾坤垂盡秦關壯日月低分隴樹懸代馬
長嘶蒲海雪胡烽不動玉門烟星週甲子逢初
度堂敞寅賓簇舞筵樂奏燉煌歌纂纂遂吹阿
鞞鼓齜齜長庚流耀朝南極壽域無津隘八埏
蒼陸條風隨律轉崇臺藻井映霞褰龍沙曲抱
青冥外嶽色高盤紫氣前涼沁金莖雲表露香
沾玉井華峯蓮花繁火樹宵三五上元後三日
爲公初度辰
先期於清寧
臺稱觴爲壽酒汎新豐斗十千盟儼岱宗刊若
礪詩賡天保咏如川匡時石畫安危倚奕葉綸

音寵錫駢身際兩朝名益著宦經三仕節逾全
昔當穆廟臨軒日正是清河入洛年牘上公車
聲藉藉賦成羽獵思翩翩材標竹箭初收越價
溢龍媒已售燕通籍都官茲不忝鄭谷嘗爲
刑部郎剖
觚寬法更爲圜灰燃時按平反獄律暖春調燥
溼絃咨爾祥刑郎署重恭承典禮帝恩偏宗儀
斟酌叅中古郊祀寅清格上玄聖主薦禧祠泰
時侍臣待詔奏甘泉田生姓氏曾題柱江湛風
華邁掌銓昭代人倫歸藻鑑中朝庶品藉陶甄

明堂瓌器題瑚璉清廟良工識梓梗歲歲鳳皇
隨羽筵振振鷓鷯屬班聯于時東閣收私謁或
就平津托附羶鸞軌從來由直道豨膏終不運
方穿一麾問俗廻閩海九曲尋源訪魏騫粵嶠
靈丘資攬結無諸舊國待旬宣斑衣苦憶萊庭
綵初服仍紉郢澤荃入道歲符都水監陶弘景
年三十
六挂冠神武公
亦以是年乞養抽簪興似剡谿船承歡甘毳唯
親供侍寢中蓑每自漣蔣詡厓能開竹徑戴符
未具買山錢尚餘邴祿堪烹菽豈有佗裝屢擊

鮮聳壑長松蟠翠蓋繞籬叢菊委金鈿平生穢
賸王恭簞故物惟存子敬瓊精舍別依雙樹苑

窪尊間飲五雲巔

公愚谷山房後爲五雲山上
有李陽冰窪尊遺跡古篆

探幽茗椀留鶯語選勝巾車倩鹿牽水落石潭
閒釣艇風生天籟荅歌舷熊轡忽起東山臥鶴
夢翻驚北牖眠遂向赤城持憲節早聞上谷戒
戎旃銅焦行擊巖游徼尺籍頻稽汰濫員絕漠
犬羊屯蠓螭高空燕雀避鷹鷂量移頃復遵河
洛汪濊應知沛澗漚中土褰帷廻菜色南陽爲

政示蒲鞭提兵遄指雕陰旬建隼俄停榆谷曛
彰武軍聲飛白羽朔方俠少枕黃肩烟銷古戍
花迎蓋陰合行營柳拂鞞坐使折衝摧部落並
宣威德止戈鋌皇情特簡勛庸舊青土欣瞻闡
制專遼左旌旗殊未偃大東杼軸正蕭然常平
難致鄰封糴昏墊微紓井稅蠲六郡賑饑捐月
俸萬家就食待晨饘時山東歲凶公煮粥賑饑活數百萬人
不瞻輒割月俸以佐復於沙中墾田數千頃

生徒講德歸如市流寓同仁悉

受廛盜散綠林齊解劔農占赤鹵事屯田縱逢

蠅點光彌瑩何卹人言職罔愆鱸膾正思嚴瀨

美蛾眉空妬楚宮妍老更遠道攀轅別叅佐深

愁命駕還高韻豈宜嬰世網冲襟差可離冥筌

清都窅窳通瑤闕愚谷涇隴類善卷掃軌避人

忘俗諦閉關觀妙契真詮素書業已弢黃石密

印應須證竺乾藜杖行吟風謖謖團焦暝坐息

綿綿每攀古洞衣單綬便倚層崖結數椽絕頂

鳴鐘飄梵唄叢霄飛組載輕復公於仙榜巖半壁結超妙軒時

輿以輓轡繫笥遠公投贈匡山偈白傅歸叅淨社

禪危傍鵲巢，劔磴道深從。虹澗引潺湲，欲資舟楫須。商佐爰卜熊羆起，渭畋豐芑陪。京元舊宅奉，常清秩斲南。遷精藍縱目，饒休暇臥閣。齋心愜靜便，操動匣琴流。楚雪墨翻棊，几瑩吳箋爐。添艾蒨浮筠，榻架插牙籤。照蕙櫺，問字圖橋多掌故。時公攝國學校文芸閣費精研，解頤自昔稱匡鼎。疏注于今賴，服虔幾夕刺。閨傳翟道獨推開，府鎮鄜延和親每。陋前朝議戰，款兼收策虜權。卽遣貳師搜內套，更催飛將出祁連。雙鷗漠漠

胡天宵列騎，駢駢漢壁堅。甲帳佩刀裝，大食鬣奴腰帶刻于闐。飲飛角勝時，超距部曲捐。生日獻豨斯，泮芹河晴浩。淼泥融駝嶺，碧蜿蜒客翻勅勒頻。中聖境拓波羅徙，右賢草合獵塲圍。蹴踘槐交馳，道競鞦韆廢。兒監牧過毛，仲侍史諧音類。左驥彩勝歲，蕤連理豔蘭。膏璀璨百枝燃，丹青早入麒麟畫。徽烈行將琬琰鑄，笑我丘樊甘瓠落。因君夙昔共周旋，晤言恒挾環中秘。逖覽兼收物外緣，澤霧無文非隱豹。逢秋抱葉信

寒蟬仙仙喜遇鴻蒙後
嘿嘿疑探象帝先
國士長懷知己感
雄心恥受衆人憐
鳧舟往附鼇宮
泛鶩蕊遙思鴈宕
舉劇語鄉音經歲洽
旅游桂魄幾回茲
鴻裁舊已傳通邑
蠡測真慙忝握鉛
擢異羣珍羅秘藏
鈎深織繭出重淵
錦寧待繪行行麗
珠不煩規字字圓
以爾陽春侔下里
亦如濁水映清漣
幸叨藥籠終難棄
雅愛著簪未忍捐
亭榭公餘閒引矚
壺觴燕喜醉還傳
渠分龍井流波細
池擁蛟水觸浪旋
繞剝芝蘭芬媿

娜將雛鷺驚鷺舞
蹁躑功成未許從
松子道在何殊侶
偃佺欲借靈椿持
作頌試繙莊叟大
鵬篇侍御揚弱水
公祖行部東甌招
余胥會舟

中寄謝三十三韻

朱陵赤館倚天開
江漢沅湘劃地迴
分野正當川嶽會
代興因見古今才
載聞夫子關西起
共識前身帝所來
鳧是仙鳧飛葉縣
驄爲天馬下蘭臺
炎方瘴已銷霜斧
寒谷春先動琯灰
騰有越裳通貢篚
試從大鹵眺蓬萊
蜃樓雲氣浮千

嶂鼇背濤聲蹙九垓蓋竹洞懸連鴈蕩扶桑霞
起暎天台咸池浴日分華頂石壁題詩拂紫苔
彩筆定看千氣象山靈曾爲護風雷更從遺老
探陳蹟每惜焦桐拾爨材慕義雅聞公子舊逃
名敢鑿野人坏九峯鹵簿停游矚孤嶼樓船倚
湍洄折節總能寬禮數倒衣何幸忝追陪昔賢
市駿寧遺骨此日登龍豈暴顛似向鄂君歌擁
楫真從星漢接行杯寰中形勝歸標品篋裏篇
章示翦裁賦弔孝娥鐫琬琰詞同幼婦燦瓊瑰

公按部全浙因覽會稽天台鴈岩諸勝出示弔
曹娥詩及登石梁華頂觀海上出日諸石刻

式廬漸覺風還古表墓能維俗久殞揮手長憐
霄漢隔題械聊避物情猜名家時論推勲德象
緯平臨近斗魁瑞鳥九苞元鳳彩神駒千里卽
龍媒連枝譽望傾三嘏奕葉風華掩八裴自是
聖朝攄遠略故煩計相宰多財編摩有論追鹽
鐵毗倚何人和鼎梅獨揭寸丹輪北闕未忘純
白續南陔及瓜始見功方奏授鉞行看轂再推
好采民風扶羽翼直須公等樹頤頤願窺正始

汲古堂集卷二十一
追中古漫效衰風寓七哀紫氣望來頻引領綠
蘿夢後失崔嵬公曾訂綠蘿洞天之約風塵荏苒音書斷
歲序崢嶸日月催結韉第令廷尉重河山無藉
益涓埃

汲古堂集卷第二十一

五言絕句

荅王恒叔先生四首

東甌何自无咎著

客從赤城來貽我飛霞素長跼開玉函乾坤莽
廻互

龍宮吐海月的的天四垂下見泣珠人淚落如
綬縻

平生一片心匣中三尺水千古縣陸離一日輸

知已

孤嶼望赤城霞標若在眼臨風奏長謠努力加
煥節

清谿十咏爲王恒叔先生賦

瀏瀏千尺波下瞰蛟龍宅明月吐貝宮萬頴光
相射

右白龍谿

朱草擢紫莖擘如卿雲韞沃露鬪輪囷吹風搖

婀娜

右紫芝館

白雲不出山去來滿岳戶昨夜春風顛吹作

天雨

右臥雲坪

上枝拂青雲下枝蓋綠水承陰弄流泉得似陵
陽子

右嘉樹臺

三石如突星濺濺響寒瀨悟身千載前重與題
金薤

右三星瀨

放腳不知疲偶拂苔上石坐當上游山清暉澹
將夕

右忘歸石

承流汎輕筇洄波激鳴琴興慨係已往冥感徵
在今

右流觴

義和獨弭節濛汜散餘灼葱蒨紫翠交偶與冥
心約 右夕陽逕

謾謾松風鳴白鷺翔復下儂似華陽君披襟愛
陶寫 右空濤谷

傾耳谷中音村春亦清聽偶逐流雲來復與疎
鍾應 右春雲碓

城南酒壚觴陳行之

落魄未虎嘯悲歌混狗屠風塵一相見拂劍黃
公壚

桃花曲六首

儂家住何處湖上桃千樹傍水齊作花儂每從
此去

女兒來折花折花呼阿爺日日待花發花時偏
別家

回頭語阿母花似去年多阿爺昔栽桃一日三
摩挲

昔謂行當歸不謂行復久一月無客來滿甕餘
春酒

沈氏古堂集卷二十一
風吹
祇恨儂行早不緣花較遲含情掩羅幙一任春
風吹

花吹風易飛
秦秦葉初密計日待儂歸
纍纍已成實

客有對鏡
鑷白髮有感賦此以慰

老信知誰寄
春愁與鏡傳
同游半黃土
鑷白未須憐

不寐

不隔他鄉夢
無期夜夜歸
近來愁少寐
翻覺

家稀

有懷

客思如淮水
悠悠是個長
東流無日夜
憶爾共思鄉

翠羽詞四首爲小陸文學賦

翠羽小家女
含羞無禮儀
寧知儂所憐
翻在憨憨時

嬌憨復嬌憨
動止過無賴
揉碎合歡花
剪斷合歡帶

今日工笑言明朝學救洗時時過鏡臺面身自
斜睨
以彼昔日慙持比今朝妍逐時好姿首不耐阿
儂憐

鄭崑巖大中丞內署十一咏

偶現宰官身鏡機聊應物退食此委蛇長齋依
繡佛 右內院

今人仍緩帶談笑走呼韓他日駝山石還同覲
首看 右緩帶軒

金葩映紫莖託根非有待異本不異林同心復
同采 右芝蘭室

空齋澹夕陰疎鐙照幽獨枕上生風泉淙淙漱
寒玉 右鳴玉齋

欲探雪竇泉真源宵何在七竇阿耨池一勺函
香海 右雪竇

高秋眺崇臺大漠黃雲開振衣一長嘯雄風萬
里來 右清寧臺

雙樹蔭平橋獨夜驚栖鳥不知片月來誤作關

山曉 右雙樹橋

文木何夭矯脩脩映華林手弄綠玉塵冷風生
素襟 右嘉樹坪

孤亭一以眺落水連寒山乃知會心處不獨濠
濮間 右會心亭

葡萄覆層壇采采釀名酒自乞步兵厨不博涼
州守 右斗壇

五月花初放飛英點水濱玉關芳意晚翻憶故
園春 右流花逕

秦淮閣夜同周叔宗賦四首

快鶻自摩天駿馬不著鞭少解石城曲能取小
姑憐

小姑住青谿夜至青谿宿不見蕩舟人樹底秦
淮綠

鳳凰嬉朱光承君長夜飲鴛鴦結兩頭繡作葳
蕤枕

燭影盪流波波光含蕙閣白露凝玄霜芳蘭委
率薄

天門山

山到天門斷江吞楚雨
渾征心宵無際暝色帶
荒原

東坡晚霽

半畝東陂竹流雲涼翠
通日落微雨歇濕螢耿
幽叢

吳門別冒伯麟

寸心忽千古愁來無一言
昔人不可見長嘯下
吳門

汲古堂集卷之二十二

東甌何白无咎著

七言絕句

同楊木父王昭粹邵少文集孤嶼分韻各
賦九絕

烟嶼微茫水國分
四天樓閣俯春雲
潮音欲沸摩羅頂
得似楞伽石上聞

碧海雲霞乍有無
晴陰四望衆峯殊
伽陵樂奏金輪鐸
寶月光搖佛髻珠

峯陰海色滿藤蘿。謝客亭前水自波。采得石華
亭下薦千秋。誰與和羊何。

江柳江帆映遠洲。江門餘照帶羣鷗。香臺茗供
逢僧鬪。曲檻鸞聲盡日留。

兩峯南北信吾之。酒棧茶鑪動自隨。醉殺醞醅
江氣暖。斷霞殘靄會心時。

中天繡塔擢雲平。磴道盤空飛步驚。鼇極欲移
龍伯國。蓮臺忽湧化人城。

灌木繁陰深欲煙。宴游猶及送春先。東林蓮漏
延清賞。落盡檐花日似年。

竹裏琉璃建法幢。鏡中四寶合雕窗。一從龍象
開初地。信是獼猴別有江。

飯依自供寶華光。銷盡淋漓酒態狂。趺坐盤陀
飛鳥盡。渡頭纖月別支郎。

鄧太素孝廉自廣陵携妾過白門取道還

豫章贈詩五首

隋苑瓊花影碧窗。花間翠羽隱雙雙。絳如五鼓
城烏起。兩槩橋頭催渡江。

不勝羅帶擢纖腰。離合神光近若遙。郎底渡江無所苦。妾家慣識廣陵潮。
秦淮水榭月如烟。月裏歌聲阿那邊。橋上女郎齊看月。不知箇月爲農圓。
十二飛鴻玉柱寒。黃姑織女絳河乾。深閨不解含新怨。鴛綺縫襦合歡後。白髮左世情。
九江九派九迴腸。石鏡何心照晚妝。不道無情猶有恨。小姑隔水望彭郎。

南麂四首

青天寒寫萬峯高。挂席來觀碧海濤。便欲因之龍伯國。看予一釣掣神鼇。

霞氣蒼涼日一丸。恍疑神鼎浴金丹。試招夸父吞精魄。先借長風吹羽翰。

素車如擁海神來。貝闕銀城次第開。爲遣白龍翼舟楫。更教玄蜃湧樓臺。

金膏水碧賸爲糧。亦有龜鼉架作梁。倘挾飛仙向蓬閩。便遺玉鳥白雲鄉。

題畫竹寄空上人

空山十日雨爲霖欲往從之湖水深消盡雲堂
一聲磬祇應翠竹比禪心

虎丘東林書壁

滿寺寒山十日登三生石上一枝藤東林洗鉢
西林宿悟得前身毳衲僧

彩霞詞四首

初日流輝照屋梁瓊臺含彩爛舒光可因飛霧
隨秦女不學行雲逐楚王

濯錦江邊濯錦迴浣紗溪上浣紗來采蓮歌罷

波侵鞦韆映水芙蓉向日開

風前半臂颺紅綃一道行光近若遙花氣未消
留對酒彩雲不散待吹簫

自是青天一 片霞豈隨塵世闖穠華飄飄倘逐
丹丘去紫蓋峯頭共餌砂

莫愁湖逢程德懋

莫愁湖邊鷺莫春暖風霽日搖青蘋柳條繫馬
不辭醉飛絮滿天逢故人

刺艇東林竹下

寂寂春山誰與同。隔林田水亂溪風。石潭竹影
臥寒碧。小艇焚香細雨中。

池上晚酌

晶晶波光暝色遲。一尊耳熱放歌時。峯陰忽送
空烟白。雨挾松聲已到池。

題林松嶼隱君壁

天半雲霞翠壁開。一春風雨水含苔。山翁日坐
林間石。落盡潭花無客來。

東湖偶憩

十二烟鬟鏡裏開。盪胸雲水思悠哉。前山倒影
夕陰重。蒲響荷翻片雨來。

吳江舟中

飛盡殘霞江水平。江風斷續送歌聲。女郎柔櫓
蕩舟去。落日烟波無限情。

清江謠

江南紅豆最相思。南客心驚遠別時。飛盡寒鴉
明月上。一江烟水夢歸期。

無題

杏梁歸燕背人飛
深院沉沉靜落暉
夜燭隔花簾影動
綺窗惟聽釧聲微

羅峯寺晚坐

日沉西崦紫烟重
散步虛廊過暝鍾
掃石更看明月上
半潭寒影浸疎松

蓮上人西房

百折幽溪繞竹房
夜深拂簟水聲涼
曉開南牖仍欹枕
林外千峯半在牀

蠟燭峯戲贈范義髻

蠟燭峯頭一磴斜
砥應天近羽人家
看君未斲塵中骨
安用千年住紫霞

飲紫霄宮郭鍊師蜜酒作

醉臥天壇松子家
百花涼醞釀流霞
石牀不畏松風冷
一枕游仙日未斜

夜宿天柱峯坐月山下是夕大風雨

昨夜月明宿天柱
俯見峯腰雲一縷
朝來下山溪水深
始知山下終霄雨

天津橋坐月橋在泰嶺萬峯中

千峯繡作碧蓮華
身在花房太上家
明月一規天似水
玉盤清露汎流霞

武昌舟中口號

朝發嘉魚暮武昌
落帆猶自惜殘陽
舟人笑指歸程近
越客翻愁歸路長

秦淮美人家賞牡丹送程仲權行邊

銀笙玉管夜紛紛
紅紫催開簇五雲
預愁邊塞無春色
賒得名花倍贈君

人日送鄔生還蜀

新年有客感年華
江上孤帆挂落霞
思發花前纔七日
雪消峽口到三巴


午就碧雲寺幻公禪房睡起戲簡趙中秘

常吉

開簾峯影動禪扉
欹枕泉聲滿翠微
爲問鳳凰池上客
何如蝴蝶夢中飛

古意

君家淄右妾河陽
鵲尾金鑪換夕香
剪得冰紈初試扇
不知宵漏爲誰長



原件短缺

南明寺夜對蜀僧觀寂

何須舌上吐青蓮
天貌風襟自灑然
木榻對趺羣籟寂
古堂佛影一燈懸

夜宿雪厓樓居五夜起觀海門殘月作
枕上霜鍾夜欲殘
醉扶餘夢起憑欄
月懸遠樹沙如雪
百尺樓空海氣寒

舟泊靈福

靈潮隱隱撼船凶
斜漢沉沉界石幢
深夜起看天在水
數峯寒影臥空江

綠水曲

晚妝臨水競相窺
南北停橈惱阿誰
瑟瑟晚風幫帶動
夕陽古木女郎祠

春夢詞爲開先

五夜微霜透紫綾
潘郎愁重髻難勝
春江無限相思夢
一半金陵半廣陵

登明敎寺臺舊名較弩臺曹孟德閱武處
淮水東頭魏武臺
阿蘭門對夕陽開
江山萬古銷沉恨
有客看碑日暮來

留別逆旅主人靳六老

微茫烟樹遠連吳，明發蕭條驛騎孤。
公子俠魂呼不起，只今賢者在屠沽。
綠酒如烟不待賒，酒醒殘夜爲敲茶。
故山他夕能飛夢，淮水東頭靳老家。

舟次桑溪待潮

落帆淺渚逗蘅皋，瓦盎蓬窓試濁醪。
碧水鱗鱗魚浪動，青天剪剪燕風高。

夜就湖陽移桃李歸栽草堂口號

花影婆娑映綠波，月明雙槳動星河。
荷鉏商畧宜栽地，爲問園丁柰晚何。

山房木芙蓉盛開晚，以妻子張燈飲花下。
戲成四首

木末芙蓉爛着花，晚涼無客過山家。
直須綠酒酬秋色，更遣紅燈綴晚霞。

小兒雪藕女焚枯，花下山妻酒一壺。
試挿滿頭鸚鵡舞，不妨醉倒倩兒扶。

葉底田田颭晚風，燈光花暈翠流虹。
接羅倒着

花零亂影落空壇一醉翁
翁醉花狂與若何詩成還教侍兒歌絕勝步障
圍金谷花底銀笙醉綺羅

再過越來溪訪周隱君觀復

聘君家住越來溪三載重尋逕欲迷猶記別時
語童僕門當空腹古棠梨

三訪周觀復

三度重來訪故人可堪已化北邙塵溪邊小院
平爲圃門外棠梨伐作薪

漢陽舟泊

澹雲殘雨暎樓臺鷺戩寒山水上開夜半歌殘
風露急月明鶴影渡江來

水簾谷

霞扃雪竇古明庭爲惜幽竒策屢停水石漸窮
雲路絕紫厓千仞暮天青

鵝湖晚歸

微風蘋末蕩涼氛聽盡漁歌過夕照湖鏡乍昏
深受月峯蓮欲斷細生雲

白塔寺同超公待月
白恰方袍遡晚風石門幽事對支公水禽磔格
衝人過繡塔陰長月出東

曲阿道中別李道人禮茅山

句字山前路欲分華陽洞口水空聞黃塵碧落
須臾事好爲中峯禮白雲

憶羅峯寺蓮上人

羅峯峰下古招提曾記尋僧竹院西黃葉舞空
山路寂日斜相送出前溪

題仙都圖贈潘縉雲人計

由來仙吏領仙都謁帝還飛葉縣鳧聞道武皇
思采藥勿云東海有蓬壺

舟中夢羅峯寺

古寺繙經憶去年林僧寒夜對牀眠短蓬殘夢
蕭蕭雨誤作羅峯石上泉

閩詩人朱長文卜居廣陵四首

計然舊策嬾重操不比朱公乍徙陶自是一瓢
宜病色無煩客奏廣陵濤

朱樓夾岸古蕪城五兩如林鏡裏行
鍾鼓沸天
倉父醉何人執轡過柴荆
板橋廿四接隋堤故苑離宮取次題
不是幔亭
無夢到江都花月使人迷
纏腰騎鶴兩難兼鶴背天風飄紫髯
莫道仙家
唯絕粒盤中賸有虎形鹽

寄廣州別駕馮太衢

悟後浮名等蜜脾廣州別駕好隨時
枕椰樹下
涼風發試讀山人寄到詩

送諸三石之五雲并簡鄭孟仁

烟裝風馭遠如期白鹿城頭出餞遲
十石蘭英
千日醉故人今是鄭當時

清都別館倚蓬萊玉樹玲瓏對玉臺
君握綵毫
相倡和始知塵世有仙才

軒后行宮傍五雲鼎湖靈跡古來聞
和歌定有
飛龍引帝時千峯半屬君

吏隱山前跡未湮窪尊亦在好溪濱
尚堪注酒
留君醉未必今人讓古人

一墮風烟又隔年
泠泠仙夢尚依然
毛公石上
餘明月遲我狂歌
弄酒船

王季中光祿玉介園紅白梅花盛開是夕
主人懸燈數百枝花林中花下布席陳歌
舞爲高會紀勝八絕句

瓊樹懸燈照萬花花間深夜醉琵琶
誤疑曉霽
羅浮雪海日先蒸
庾嶺霞

糝徑繁英繡作茵
幕天珠樹暗香塵
儂家自有
花爲幄步障虛藏梓澤春

東圃今春春較遲
勒寒千樹尚垂垂
青衣欲奏
風前笛愁倚胡床未敢吹

寒豔流輝照叵羅
橫斜疎影度纖阿
雲霞齊布
天孫錦珠斗離離
出絳河

丹素齊開四照林
林端空翠覆松陰
紅烟半染
春雲濕絳蠟微昏
紫霧沉

似挾飛仙宴玉京
瑤華樹樹照層城
醉披宮錦
呼明月更向昆丘頂
上行

水晶簾外捲霞綃
歷亂春星綺樹搖
倒着接羅

鴻鵠舞滿身風露潤紅潮
羣玉峯前春欲來凌風臺下參差開名園萬樹
寒飄霰作賦誰當水部才

壽朱無逸四十

虬髯猿臂貌桓桓丈人矛蛇左右盤無乃笑人
殊寂寂白頭宿將未登壇

何事四首戲東朱無逸無逸新有所歡
風髯雪貌儼如仙便合騎鸞蹋紫烟何事執笏
聽旗鼓朝朝腰項府門前

薰鑪茗椀盡當家合住青溪弄赤霞何事十年
衣韎韜日隨小隊曉排衙

繡衣錦帶佩吳鈎借面能充萬戶侯何事薄糜
仍不繼月隨哨長散糧籌

問君何事柰君何一物於君已較多聞道錦窩
人似玉燈前低按石城歌

西湖戲爲陸君策孝簾贈侍姬

小姑歸去晚風多脉脉湖煙送棹歌深夜月來
山在水天留玉鏡照雙蛾

羅峯寺

風落餘花石礪香樹翻殘雨竹床涼讀餘小品
了無取清磬一聲來上方

別仲權

廿年離合幾含情此別應難問死生
拚不知君何處去津亭他日莫題名

鶴林池上

水滂橫塘半夕陽烟波汜柳動晴光
文魚唼荇驚盃瀝幽鳥銜花下笛床

游榆塞江上臨發別社中諸子

春江別酒惜斜曛江柳垂垂綠未分
容易滿天吹作絮梁園立馬正思君

山色依依別故人風花嫋嫋渡江春
終南太室堪乘興不是懷書西入秦

社酒吹香生綠波離心倚醉托悲歌
預愁飲馬長城窟楊柳青青柰爾何

駿馬長嘶夜渡壕俠游曾逐五陵豪
風塵一掬雄心盡慙媿尊前脫寶刀

和邵不朋孝廉寄遠韻七首

黃榆檄檄動秋風
疋馬西征逐塞鴻
才子獨推秦上計
青閨錦字較誰工

玉河寒月墮空階
無寐敲殘紫玉釵
侍女更添沉水待
不知夫婿已天涯

鴛瓦微霜夢乍還
夢中髣髴見榆關
宮娥好待張京兆
嬾拂盤龍畫遠山

黃河遠接受降城
豈爲對自請纓
莫道深閨愁夜漏
風笳霜角總邊聲

儂家家世本金閨
一闕烏栖按曲房
越客欲填

吳語澀淚滋庭樹
暗吹霜

相思亭下雪初飛
嗚咽泉頭客未歸
月出愁聞

南去鴈含情
日擣寒衣

入握鮫珠字字圓
意中幽恨倩誰傳
駝城亦有思歸客
爲和平原贈婦篇

簡張東山大將軍

清世將軍且息機
兜鍪生耳劒生衣
雄心一片知何寄
日暮南山射虎歸

塞上

赫連城上月如珪，鳴咽泉頭烏夜啼。臥聽胡雛吹簫，築秋聲一夜滿關西。

望嶽樓

華陰春望陟春臺，臺上三峯曙色開。漢時巴平芳草綠，天空仙掌白雲來。

孤山探馬

胡烽夜渡陰山窟，城頭野日昏如月。一道黃塵探馬飛，唯見旗尖出復沒。

延安

寒山斜影塞河流，高柳荒雲隱戍樓。人馬縱橫斜照裏，分明畫出古延州。

清涼千尺湧蓮臺，山下孤城百雉迴。石扇白毫

千佛現，雲標翠壁五丁開。

城外有清涼山洞，中鑿佛像千餘尊。

偶見村兒放紙鳶，戲成八絕

重

二月天宜放紙鳶，楊花滾雪絮飛綿。手中線急

須防斷，莫遣春風太放顛。

羽翼唯憑紙數張，偶因風力恣飛揚。羣兒莫漫

誇高下試較懷中線短長

風高線弱轉難收飄瞥東西不自由刺罨春衫
渾未覺那知前面是深溝

西山却在東山西遙望西山山影低何恠兒曹
不解事自矜鳶與日輪齊

日日飛鳶向此來平郊不放長春苔偶然戲劇
須臾事鷄第鷹兒莫浪猜

如雲片影任風飄似向煙霄惜羽毛放盡線車
天不極依然無際蔚藍高

不須六翮也翩翩亦自搏風簸遠天四海漫隨
黃鵠舉一絲偏繫小兒權

圖畫空傳郭恕先紙鳶竹馬憶當年童心猶有
詩狂在欲倩扶搖送上天

同楊木父集王昭粹池上

北郭先生愛酒狂掇英滿把泛芳香挂衣藤蔓
低臨水拂石雲光近度墻

青袍白帽南鄰客葉響霜林來柘屐拍檻繞池
呼綠尊水雲日射鱗鱗白

江陰發舟

十月遲迴江上城
夢中離恨客中情
人間何日勝今日
打鼓發船第一聲

蓬窗下恰對清江斜日時
柔櫓咿咿酒數巡
燈前童僕轉相親
解衣拂簟未成寐
七尺方知不屬人
一昨離歌淚滿纓
依依無限故人情
舟行稍覺歸心緩
惜與親朋別較輕

橫春曉渡

潮落空江木葉稀
霏微水霧掠人飛
雲扶海日眉間起
暖氣先浮露濕衣

送王贊夫應試北上并簡項休寧劉合肥

時贊夫取道白岳金斗

送君明月滿山阿
陌草青青水綠波
一襖素絲聊解贈
貧交其柰次卿何
軒皇遺跡有丹丘
風馭烟裝作勝遊
溫水香分雲外液
赤珠光抱日邊樓

白榆歷歷挂叢霄，嶽頂玄冥絳節朝。應有雙鳧過葉令，月明天柱坐吹簫。
風流劉尹舊，過從夢隔浮槎江。上峯閔叔那能累安邑，相如元自重臨邛。
大羅天上蓋珠班，奏牘三千動聖顏。駟馬赤車歸未晚，爲君先主吹臺山。

送蔡審理需次赴秦府

淮水相逢欲暮春，楊花歷亂滿江津。昭王不樂應侯老，躍馬看君正入秦。

贈祿命家馬生

布笑傳君技入神，翻因儒術轉相親。與君同住

熙熙世，唯願江湖少異人。

術者挾詐驚愚往往致亂近東吳名家子

烈禍可鑒也馬生烟榻人矛樂爲之游故有此贈

夜坐

松龕繡佛一燈明，寂歷林堂夜色清。掩卷已空文字障，坐聽寒雨欲三更。

同龍君御行部雲間戲作

時君御左遷監判官

打鼓夔夔曉發舟，半爲行部半清遊。莫言江上

海古堂集 卷之三
鹽官冷曹佐如牛喘未休

曹佐如牛用李長吉語

方船歌

月出湘江風露涼方船兩兩棹相將楚雲飛盡
天無盡一水牽愁羅帶長

赴弔鄭中丞送朱生還吳朱以善謳稱

此地逢君又別君鴈山明月虎丘雲尚餘一掬
西州淚欲和吳趨不忍聞

南來海內漫興四十四首春寒甚劇
夜坐無聊獨撫濁醪陶然耳熱偶感今昔

所遇矢口成韻拈筆隨錄聊用自娛而已
語猥雜鄙俚不倫弗論也

衡門一水接三溪東渚東頭似灤西子晉笙臺
梅福嶼青鞵隨地有攀躋

南汎汎江西入秦梁園賓客半灰塵髣髴如此
不歸去逢着沙鷗定笑人

愛對雲山日倚樓貪看煙水晚移舟酒鎗詩卷
從吾好濯足放歌殊未休

南山欲雨雲不開草堂坐失青崔巍晚風雲卷

翠屏出白鳥一行何處來

古藤覆瓦竹穿沙竹下西鄰是酒家閒就涼陰
壚畔醉臥看風落石楠花

一溪中畫垞東西雙垞家家傍綠溪決溜種瓜
文鯉上開門洗藥水禽啼

瑤池桃樹一花開人世興亡又幾迴誰信侯家
開邸第只如蜃氣吐樓臺

藥嶼茅堂處處幽碧潭如月印中洲儂家家近
蓮花蕩稚子乘風解美舟

懶慢相仍不用名力桑寧羨拜公卿只愁俗客
來多事爲說山翁困宿醒

兼乘連床動萬緇欲令捨筏轉茫然冥觀好擬
秦灰後獨探庖羲一畫先

何人高潔似王維贊夫有美詩名過項斯季興谷口
子真陽今不忝歲寒三老共襟期

道韻文心與勝情每從千里覓同聲美人何幸
當吾世咫尺雲山共主盟

中歲卜居還卜鄰種松那得似龍鱗東家百尺

參天勢許客來看不厭頻
人言癡叔豈真癡謝傳徒云自教兒商略眼前
何物好且揮陶令手中卮
力田輸稅食爲天誰引羣操反噬權急遣渠魁
先釁鼓耰鋤不到縣門前
負暄散快重吁嘻上下千秋幾亂離飲啄只今
忘帝力幸逢畊鑿太平時
此生幸與太平期野老時能說亂離聞說亂離
猶下淚沉當身遇亂離時

夷舶漂風到海濱自來自去若無人輕裘緩帶
多方略林木先教受斧斤

買絲欲繡趙平原曾示山妻舌尚存晚向桑門
叅不二毘耶居士本無言

山風如霧掃松花石塢烟青正煮茶誰肯同僧
上方住雲根箕坐嚙朝霞

標枝野鹿更何鄉一枕空令夢上皇騰有青山
如太古今人誰復祝康桑

紫霧困困海氣蟠春殘水國足風湍雨餘忽送

魚龍氣落盡江花尚曉寒

十日春陰冪野昏一溪殘雨帶花渾夕陽小塢

遊蠶亂新水方塘浴鳥喧

梵函木患締初因始信堯天有外臣誤逐酒人

工兩舌已從法侶證三身

繫馬長松日欲曛縱橫斷碣辯荒墳夜臺有酒

能沾否爲問此中冥漠君

玉鞭寶馬鐵連錢曾逐春風俠少年回首萬緣

成一笑獨持半偈佛燈前

潭綠煙青沙日黃天空雙峽應鳴榔漁父得魚

鼓棹去散髮放歌溪水長

投竿閒釣石溪魚溪上晴雲自卷舒爲問漢家

何事業祇憑圯上一編書

亂山浮黛壓魚舫日緩行雲進晚汀兩岸野風

催舞棹委波千尺插寒星

春醪獨引眼離迷勝事隨人信杖藜乘興偶然

無所詣欲尋村北誤村西

大鵬風背恣飛翰蠹睫焦冥亦自寬漫向一蟲

論小大十方寶刹現毛端
真亦自空
團團芳樾浮新綠
習習涼風蕩微燠
一室蕭然
佛火紅所欠山僧來共宿
人言林蕨乘
少耽聲伎醉絃歌
晚愛空山臥綠蘿
清興莫教
消煞盡但逢村釀飲
亡何雪
吹笙臺上雲如笠
君子峰前雨似麻
三日不來
池上看樹頭飛盡
一庭花
十笏方池水石寬
飼魚每爲減朝餐
誰言魚樂
如濠上白鷺朝來照影看

襍田社鼓走兒童
醜酒叢祠乞歲豐
深夜言多
田父醉兩行燈火出林紅

故人過訪感離羣
促鄰論文坐夜分
夙昔雄心
時一露月中呼酒隔山聞

逐虜曾隨趙破羌
拂廬炙血噉黃羊
豐貂裹額
脂狼籍笑憶胡姬半面妝

東家娶婦鬱金香
三年刺繡成鴛鴦
西家娶婦
牛衣宿一歲生兒似鳳皇

疎狂祇合世人嫌
何必藏名與剗廉
一月喜無

車馬跡晚風細雨讀楞嚴

苦憶平生康聘君裕一坏湖上冷孤墳追思二

十年前事悵望高天有斷雲

黯黯春愁獨閉門東林鐘鼓報黃昏挑燈兀坐

不成寐拍案掩書無一言我六指不備以次

我家小女字平陽善病何緣乞禁方彈舌夜來

持佛母洗心曉起禮醫王

移得山花不辯名愛花長自繞花行只愁毒螫

防毛豸先向如來懺殺生

夜集王季中光祿宅賞夜合花花環列四

座數百本燭下香氣蓬勃殊快人意醉後

和季中五首

廣除四月雨初晴夜幌千花月避明二十四番

花信後殿芳應讓合歡名夜合一
名合歡

合歡一朶已飛香況復千枝競素粧洗却鉛華

同號國稍留宮樣額微黃

縹蒂微頰瓣卷綃檀心香暈逐風搖中含一點

鮫珠濕仙掌熒熒露未消

接葉欹風向晚披四筵花影碧迷離已教流豔
欺銀燭更遣吹香點玉卮

林香酒氣沁涼雲燭下細縵望不分新譜已看

邀彩筆素心未許浣紅裙

時座客云恨無紅裙行酒戲爲解嘲

長干客舍送黎孝廉入楚後夜口占

十日連牀袂乍分夜深酒醒誤呼君應知兩地

傷心處江路猿聲也獨聞

別友人之夜郎

萬里泮河繞夜郎千山密箬瘴爲鄉月明猿嘯

盤江路不待三聲已斷腸

重過楊姬池館時姬已沒

池光如鏡含朝景美人粧成照斜領蛾眉已逐

彩雲消日與鴛鴦美雙影

臨池曾倚赤欄杆露澀銀笙玉指寒一片歸雲

閒美影猶疑月下步翩翩

池上簪花照影來履綦行處已蒼苔碧桃不殉

香魂去依舊春風一度開

同金元朗過傅氏舊園同賦句對體

元朗云夫

戊蕭關一絕乃唐人句
對格也 因同擬一首

一番艷曲一迴新歌扇埋香舞袖塵今歲燕尋
前歲主看花誰憶種花人

病中金生以相人術見訪因書其卷

行散經時闔竹扉雨中苔色欲生衣可能遊戲
如壺子先示巫咸杜德機

汲古堂集卷之二十三

東甌何白无咎著

鼎湖草序

縉雲之墟層崖崇巘寒霞揭日縣亘而迴復闢
若清都紫府者是爲祁仙妙庭之天洞宮石室
潛通冥廓不可殫窮積潤下委則好谿之水出
焉水上一峯標拔介立若表四望者曰鼎湖蓋
神秀之所會而靈真之都也崑巖鄭公寔產茲
土公夙負高世之度冲夷淵穆脫落塵滓雖志

存拯物而德標素尚於世固泊如也是以應物
迎機運而不宰其邁徃之韻若舉一世無足以
移其神者豈非恬愉虛靜有足以資其用哉公
弱冠登朝歷試中外綜練國章鑒達治體乘理
照物動必研幾乃聲詩之道勇往獨造渾雄邁
逸直抒性靈遠謝雕績瀏瀏乎輞川襄陽之逸
軌也公嘗林居十餘年逃覽返照故其所撰結
咸得之激觀冥會之表又嘗偕余撰杖鴈山之
顛流覽諸勝所在題咏率多玄遠冲澹之致其
志操潔故託物芳興象融故鏡機徹風神爽故
寄興超造詣深故命意遠要之窅眇之旨不可
得而窺其倪也豈若輓近之習務獵菁藻縛采
以售時好者已耶公於書無所不讀至若軍國
遠圖刑政大典靡不淹通具有成譔茲集者特
其旃林瓣香香海一勺耳異日告成藏之鼎湖
石室千載而後必有龍威左元放者流能發其
秘斯足以闕公大全矣

白下草序

夫世所論次道德功能能無待於言乎微言弗見也是言者豈非緯德之符樹功之表乎卽有振世之傑顯定宏業恢張嘉猷芳徽懋烈烺烺流于無窮者非籍遺言而聲施益章者乎至若苞德蘊真之哲栖神無朕游思霄霓芒乎習乎似若無待於言矣時或契機采韻印法宣音無不合響赴節淵淵焉泠泠焉若被諸金石也者庸詎非天動之妙哉人將自託於玄虛沾沾於功名或以爲剩言或以爲未技自遜其所不必

知固非通人之論也枯蒼崑巖鄭公弱冠影纓中歲慕道出則鳳跄退則鴻冥或顯或晦弗弗弗留蓋執其道樞而遊於世者也乃於風雅之什氣韻沉雄音節淵亮肅則玉藻冠裳古則瓦棺神鼎巧則銅儀木爲清則玄霜紺雪是編也蓋公官南奉常之所著也秣陵佳麗自昔稱詡古跡名區往往而在而又學士大夫鴻生碩彥之所畢輳公休沐暇接席方車多所宣鬯或寄悰于雅集或紀事于勝遊或觸景於撫時或蒿

目於世故淪淪乎熙代正始之音也余不類受
知公最深比客公署中凡閱月間扣公以經緯
安攘之略公輒爲譬說若鞏鑑之在懸鴻鐘之
承簣也乃復請進于是者公之言曰萬物之微
出於一機百事之根攝於一門不爲事始不爲
物先虛之至也物觸則應應盡則融圓之至也
寵辱不載嗜好不存和之至也不爲物散不遂
境遷粹之至也嗟夫是寧獨喻于詩乎太上所
謂不朽者三公庶幾其人也余之於公也猶襲

蟲之於黃鵠也烏足以知公又烏足以論公詩

項季輿各公贈言小序

丁酉歲余與季輿同客長干里季輿向予指酒
壚舊遊處未嘗不憮然低徊久之往季輿年甫
二十從闔閩溯長江縱觀金陵風物遂移家焉
凡十年所季輿與藻思瑟颺酒氣淋漓一時賢豪
高勝之士爭願交季輿而貽贈之什溢於綈帙
然季輿邁往不屑之韵豁然自如未嘗以是相
倚重爲名高季輿旣歸臥陽湖之上手葺先叅

知舊廬傍斥隙地藝松竹蒔花藥引礪疏池芟
林開逕峭閣涼臺頗極清遠幽蔚之致污邪蟹
螺種秫居半歲了麴蘖事客至輒擊鮮行酒酒
半命韵賦詩詩成擊石而歌意象簡逸自足於
懷醉就美蔭卽哈臺斲臥矣不問客之去留也
又十五年予得卜鄰於浦東往來季輿居不三
里余旣與季輿爲世外交復與冢君申以彥深
敬弘之約烏羊繫車提壺爲禮春秋佳日携杖
相過從無間也一日季輿手名公贈言一編授

余曰不佞顛毛種種請從少文一室臥遊第念
海內交好詒之篇什一別如雨俛仰夙昔慨焉
交心乃從簾中發投贈詩若干篇詮次成帙以
付剖劘竹屋燈火間命童子歌之恍若其次於
面也夫嚶鳴黃鳥則託興於高恢求匹孤鴛或
緬思於王粲司空以倚桐寓贈東阿以芳草喻
懷綢繆之辭豈獨古人哉季輿重交道敦風義
以是編藏之山中當不與金石竝泐也予旣覽
集中諸君子溘焉異物十居二二三至若西州山

陽之感則又不獨季輿也

石屋先生詩序

今人稱詩者無論五都之市卽十家之聚亦不
乏人莫不沾沾家寶火齊而積珍木難標樹靈
蛇而品目繡虎首簡不必授之見解論列不必
見之精覈卒多游詞無規有頌以序求詩弗得
也以詩求人弗得也茲道於是不競矣余自弱
冠遊海內海內人士操詩者雲興霞蔚類多標
撮菁藻步趨時好卽之非不雕績萃縛於古法

未有合也犁然當於余心者抑何寥寥彼其鶩
於外境故不足於內天機淺人欲深其不鵠於
古宜也余鄉陳石屋先生少負清操授徒里中
垂四十年幾令華陰成市而玄散高勝之韻超
然物表昔人所謂宅不彌畝而志忽九州形居
塵俗而心栖天外隱不違親貞不絕俗則先生
其人也故其所撰結多清華蕭曠語瀏而不浮
沉而有致境真趣遠出自胸臆不假議擬卽象
天隨意匠有餘生動不匱讀之如吸雪山酥酪

如嚼哀梨瓊蔬快當何如先生雖浮沉閭右乎
吾知其拙於今而贏於來世也必矣若彼操技
取償目前者以先生眠之直蟻螿耳先生當不
以此易彼居其實不居其華蓋先生得之柱下
之旨云

湖上草序

予友季中王君刊落游閒紈素之習而勝情遠
寄風藻遐騫豈不翩翩韶令名士哉季中先大
叅公治別業於陽湖湖當三溪之匯天空水濶

松古雲寒季中暇則刺艇藕花蒲叢中沿逗於
烟波沙嶼之階左摩彝鼎右披圖書焚香煮茗
脩然人外望者儼之趙孟堅米海嶽書畫舫日
吸其靈爽清寒之趣發爲觚翰合音赴節若繹
儲孟諸人逸思雋響也其取境傳情清暉映發
又如攬華子岡輞水漣漪與月上下濯濯挹人
清徹毛膽予弱冠交季中時予豪於酒藉以消
其坎壈佗佗傖之氣被酒耳熱仰天烏烏矢口放
歌纚纚累數十百言不得休季中亟規予曰子

所不足非才也大而無當法於何有所謂屠龍
無用不如履豨玉卮學折寧寶康瓠子其取法
於古則古幾已予未嘗不心折其論間酒酣輒
洗洋跳盪行意自若也今駸駸過壯精氣銷亡
比上一屨東渚山中去陽湖若衣帶時時以文
酒相過從竒詭高勝之事得與季中共之間一
諷季中湖上草覺我形穢悔其少作今且從事
季中疇昔之言庶幾若裴迪自附中允取信來
世不識季中爲我僕一指否季中篇什尚多茲

湖上其一種云

鴈山十景記序

鴈蕩於予爲家山也俛仰二十年所匪屨凡六
至昔人謂鴈山旁魄邃夔山靈不自愛其秘我
得濟之以勝具一月聚糧之屨得皮膚耳審是
則非乘蹻徑度者終不能窺其蕃乎予獨爲不
然若縋海者業擿昭涼明月而出無論紫貝明
璣已藉令冥搜逖覽勝有踰於龍湫靈巖之大
者乎余曩遊當其遐矚吁駭之際極欲有所述

顧賦範者如彼其瑰麗此則方幅卑卑兩者不相值而難於名狀輒憚而止已從它所見紀載政不必雅馴及稱所經歷犁然有當於予心乃復自悔曩卽不文豈不賢乎恣恣夢境耶王昭文文學嘗侍其先公駕而遨乃撮其大者得十景歸屬婁生圖之毫素持以示予予披閱數四喜其赫蹠僅盈咫而所挾甚弘予乃置身其間若可覆探也者豈古人所謂撫琴動操衆山皆響者非耶乃知予嚮也動與物交謀於目者其機淺今也靜與物遇會于中者其機深圖之不可已也如是夫退而抒其昔所經歷撰爲十記卽不文弗論也乃若丹青其舌組繡其詞則有國初李著作五峯先生諸記在

送劉長孫將軍守備三江序

予弱冠操觚爲韻語雅習里中劉將軍恒山先生先生目光如炬神鋒奕奕顧眄燁如也於書無所不淹綜援筆數千言洗洋自恣符采渙發舉其節則淵淵悲壯慷慨沈雄時推執牛耳不

得不歸之先生先生固無所讓也先生世將家子乃於珠鈴金匱捍闔竒正之秘靡不心融神會乃復練達當時之故務叅其變先生所負旣瓌竒意氣務上人盃酒淋漓稱說天下事鑿鑿中窾會文吏或以跗注易之先生輒瞪目直視而或佐以排調譁浪卽其人形色不堪先生夷然弗屑行意自如也於是終其世與時相柄鑿時長孫爲子侯方髫年有異質日記誦亦萬言一日先生詔而謂之曰夫子也先世以徽烈昭

宣於時豈造物者獨嗇於予邪或謂乃公竒於數乃公非竒於數而竒於人也使乃公稍頰而趣功名之會無論萬戶侯卽持梁刺齒肥懷黃結紫豈瞠乎人後哉人我易之我故難之人乎何尤予之不能爲籛篠猶直不可以爲輪曲不可以爲矢天寔命之矣雖竒於人而寔竒於數哉小子勉之矣長孫旣勝冠襲爵服世官才名輒駸駸起長孫藻思閎瞻綽有父風而清華冲婉不啻過之淵覲玄遠之度望之令人意消文

吏間有易之者長孫弗之忤稍與之周旋覽其風期韶令文采歲蕤不自知其色降意下已復扣以軍國大政長孫輒又纏纏中機中權不必得之故習而量劑時宜較若懸衡始易之者而終內自責似若無所容者於是諸縉紳無不交口劉君也者國士少雙洎從事主衛篆則衛事效主芻粟則漕事效甌三垂踞海爲越最要區脫槍纍不戒唯倭是虞頻年以來弓無解檠矢無離箠氛稜廓清而武備特奮者伊誰之賜哉

實長孫居中堅勞苦董振功居多當事薦剡凡婁上遂擢楚三江守備諏行有期在事諸將佐以余名世習長孫乃以贈言見屬余野人也烏足以圖當世之務卽終日言固知無裨長孫囊底餘智也雖然予雅好游足跡半天下比從關洛出西塞黃河源委大漠莽蒼壁壘要險土俗羯羗士馬勁弱間從諸宿將稍習之竊謂當今西北策虜東南策倭九邊當天下勁兵處割縣官財賦之半以事邊雖政有張弛而將士思一

當匈奴以自見者在所不乏且遘胡運式微角
崩乞款我得以表餌羈縻之嚙梨則與款跳梁
則接戰戰款之權實出我握日本思內訌非藉
風汎不得竊發我瀕海險隘在在戒嚴戈船樓
櫓時而修繕蘭錡渠犀時而飭治將領兵士時
而汰練勞逸之勢我亦得而主之至若當今隱
憂計無踰於楚者楚自蚡冒以來修其車賦與
晉更霸門戶庸蜀襟帶荆吳昔何充亦謂荆襄
重地得人則中原可定失人則社稷可憂矧當

今爲

肅皇帝湯沐邑頃承平久武備寢弛余嘗浮漢
沔窺鄖襄顧城無完郭士唯空卷罷敝已極夫
憂人之憂者則策周而形著憂人所不憂者則
策拙而形隱先事設無衣袽之防一旦緩急如
禦侮何邇者撫臣失馭獷宗干紀足爲寒心長
孫倘不以藿食之言爲迂吾知長孫足以辨楚
矣先將軍未究之緒長孫將昭宣而昌大之剖
符胙土皆異日所有事楚其基乎顧余之精日

銷亡不能據長孫左席適觀其盛卽勒銘賀蘭
則長孫又善觚翰不減孟堅越石輩又無伺於
余也庶幾他日告成之後余爲長孫西向華庭
仙門間酌一鑿落以告先將軍地下可也長孫
勗旃

博古圖序

爲司理吳公作

粵稽玄始沕穆之際邈焉不可攷已洎乎列聖
繼作比象制物以通神明之德故軒轅氏範首
山之銅告成表端上賓於天夏后因之貢金九

牧圖以神姦明民牖俗俾入山林弗逢弗若蠶
茲以還物采益章厥類滋備故載味異調登實
異品於是乎有雉有鷩有鈇有鬲有卣有壘之
屬靡得而勝原也以之用媚上帝則休明馨香
以之有事嶽瀆則靈貺斯洽以之祀宗廟則薦
禧以之錫宗臣則宣烈以之供燕饗則上下惠
和秩秩乎期協于禮以度其典則豈細故哉大
適房烝小適穀烝黍稷粢餌醇酎明水莫不有
宜昭其用也天子以金其數九諸侯以銀其數

七大夫以銅其數五士以鐵其數三昭其等也
陽圍而陰方三足爲公象四足爲輔象昭其形
也夔龍雖形雲雷饗饗昭其義也蟲魚其章或
銘或頌以告戒於上下昭其訓也旣而世降政
熄禮樂廢墜先王之重器日就湮沒後迨有宋
宣和間君臣營於豫樂欲以文具飭治盡集三
代之器實于御府溺志不返卒淪於敗亡嗚呼
使能炯戒於滿溢酌中古之禮而修明之寧有
覆餗之虞哉第所刻博古圖款識形式總總悉
備默而存之足企建古綦隆之治豈徒爲博洽
賞識者之所資耶予旣讐其謬刺復以考玉圖
二卷附焉噫夫有國有家者卽先世之冠履弓
矢莫不十襲以示珍秘矧先王之重器禮樂軌
儀於是焉出昌言法語於是楷模其可不務乎
若曰玩物溺志將以宣和之遺燼沃其膏而熾
之也則余之罪也滋大

無盡法師五十壽序

萬曆歲在攝提上巳日余偕臨海王伯無入天

台從金地嶺訪無盡師於高明寺寺為智者大
師談經故處也環峰崖寧韜霞限日幽谿之水
瑟瑟東注水上古木蔽虧盤石蹲踞師為品目
題詠得景十六乃一二引人着勝地流憇欣賞
就石上支茶竈烹茗標會宗趣泠然若蛻凡
骨而挹靈氣第未知與昔人匡山東林龍門水
西之游何如耳已從山陰度羅刹江而東每從
精藍名利晤對高流韻士輒津津談茲遊若喫
彌勒泉八功德水出齒頰間一洗從前現在塵

垢或獨處稠濁中遙想而存之若已再升者已
閱明年為師五十誕辰師上足正路若而人詣
余乞言為師壽余竊謂善逝以三身乘運顯化
不可殫極世出世間非來非往寧以剩住為重
哉乃菩薩有住劫者以弘誓慈願為津梁願出
一切於業海渦漩中渡盡乃已彼且視千百襪
直彈指刹那頃非若熊經鳥申廻黃抱紫貪生
引年者比也師為龍丘著姓生有異徵少不好
弄弱冠警敏絕人每於教典了若夙習時妙峯

和尙宗風廣暢爲人天師師從剃度深爲和尙
所器畏已而潛修密證載離寒暑於天台三觀
單複之旨十境互發之論深入諸祖精髓冥契
圓徹廓然無倪其負荷用壯寔台宗龍象哉師
旣嗣法往哲已復建立玄義普惠學人東南資
叅者雲集請師悲悔師輒爲捉麈尾演說妙義
譬彼渴者之挹河無不隨分滿足故上足若正
路輦願師長生久眎建大法幢轉大法輪永爲
醫王能續慧命者其愛戴爲何如徵言爲壽胡

可已已也夫師已超無漏出息入息不染塵累
不居世中安所謂壽者相然以無上之資遠紹
台教垂絕之緒下度未來無量有情其弘誓慈
願故無異菩薩住劫者是則恒河沙數阿僧祇
劫皆師之年也豈以人世百千禩爲限耶於是
諸上足和南讚嘆謂余爲知言方展帳將命中
山氏客儒者從傍譟曰吾聞西方聖人屏棄華
縵衣糞掃衣炫耀纖麗之觀於彼法中所不載
也今也素池赤緣雕績逼皆無乃盪乎余曰不

然余聞如來國土七寶莊嚴華鬘瓔珞充滿其中以彼視此直蠶口蟬翅之末耳奚其華

燕越壯遊序送韓子綦還白岳

夫御氣跋虛乘躋徑度汗漫九垓揮斥八極脩然而逞脩然而來至人游也是爲天游采真抉勝冥搜逖覽栖神名岳放志靈區高逸之游也是爲勝遊量形度勢營沙聚米洞啓利害區分要險出奇喜功弔詭畫筭國士之游也是爲壯遊子綦少懷竒抱長負高情好修俠節高世之

行雖其托跡酒人乎而雅不廢游故勇往不屑之韵豁如也曩高將軍之有萬全之役也子綦實爲將軍布衣交子綦杖馬箠匣三尺起從之出上谷適幽州登涿鹿渡桑乾討軒轅之故墟覽召伯之舊蹟邊政興弛虜情虛實子綦靡不與聞焉當其受賑振旅推牛醢酒僚佐上壽賢豪稱觴子綦獨兀然據左席衣岑年冠側注正襟獵纓風論超超四座莫不灑然改容易聽也然子綦終不以貧故而招權利割錢刀以自徇

於是將軍稱子綦長者益善遇之無何將軍提
兵甌括間子綦亦周旋靡有間日與登樓櫓望
島嶼超然有挂弓扶桑意將軍顧子綦竒男子
間有所建白不難樹尺寸子綦迫然弗屑也一
日謂余曰不佞將歸隱黃山白岳間子其爲我
述吾之所之燕越之跡可乎予曰唯唯余觀戰
國游士之習類多操短長縱橫之術揣摩世主
傾危曹耦莫不低卬榮利浮沈珪組至若魯連
之蹈海淳于之辭封虞卿之捐相卬莫不矚然

泥淖蟬翼利達距其節概非大有過人者何以
若此子綦庶幾近之矣且予又聞至人竒士往
往遊戲墟埃之表以自放然後歛其揮霍之懷
冥栖一壑遊神于憺今也黃山之顛白岳之頂
丹池藥竈靈跡宛然悉爲子綦天游勝游之資
乎予嘗約庚生潘子仲權程子仲嘉汪子狎長
兩山子綦其預拂片石遲我否乎

高行之將軍鴈山圖序

異日高將軍嘗闡司武林矣時屬疆土又安上

下和洽日集賓客載酒西湖低迴伍胥武穆祠
下徜徉六橋三竺西陵南屏間泠然善也衍衍
焉忘返遂爲西湖長已而叅戎甌括建隼于甌
復爲鴈山長間與直指觀察使者行部流覽其
下神罷黻而弗懾憬憬然自失也歸而語何子
曰始吾之奄有西湖也其樂洩洩今吾之奄有
鴈山也神規規而弗融若其洞壑鉅麗之觀風
泉靈籟之觸非有易於吾耳與日也今吾之意
似若不能醴然於吾者其義何居何子曰今夫

毛燭夷光必也施之以丹素熏之以薺澤被之
以雲縞霧縠嫺麗姣好望而知之也若夫煙客
雲侶必也飭以青精餌以黃獨加以方袍斗笠
高逸修古望而知之也西湖之勝蕩以靡君侯
出則具樓船陳聲伎是則以丹素薺澤雲縞霧
縠施之麗人也固宜鴈山之勝絕冥介立竒削
而枯槁君侯出則下吏除道郵人供帳鼓吹鹵
簿林壑爲沸是則以丹素薺澤施之方士而復
饗鷄鶩以牢醴鐘鏞也無乃左乎是以君侯始

則衍衍今則憬憬也將軍撫然曰有是哉乃介
吾友楊木父圖其厓略得景二十木父少有勝
情歲必撰杖茲山宜得之精若胡寬作新豐阡
陌閭巷井井如畫一耳異日者君侯縮鵲印談
笑尊俎間暇則展此圖撫琴動操衆山皆響恍
若挾我二三子肩瓢厲屐獻歌其上豈不愉快
耶何必從赤松侶黃石餐霞辟穀然後稱高哉
是爲序

林孺苞憐夔草序

往予遊赤城獲納交三子焉爲林子孺苞金子
仲玉王子伯度也彼三子者咸負韜世儁俗之
氣而藻思激射濤涌逆走橫擊奔放不可禦日
與揚扞風雅之旨訢然賞會莫逆於心三子謬
推予執牛耳予竊自謂爽俊高華則異孺苞悲
壯忼慨則異仲玉幽譎新奇則異伯度兼撮標
會予則時時有之三子亦以予爲知言於是修
盟於無漏園願以第一義相砥礪已而三子三
上公車皆不利一困於綠林再困於河伯三子

生同里交相驩其坎塲拓落之遇亦略相似而孺苞復羅父兄之戚樂樂不勝衣日手一編反關謝客則與二子稍異也時予亦策羸馬從塞上歸精日銷亡息影桑陰竹浪下時望飛雲流月以尻輪神馬游三子神情間恍若遇之也比孺苞走一介以書抵予曰吾曩質所業於吾子吾子陳義甚高期吾能至所必至今者天以蹭蹬厄我又以疾病重厄我乘日之車問塗萬里安望其讐昔日之志耶將哀其大都且授剖劓

子幸爲我序首簡予旣深悲孺苞之困厄已讀孺苞詩又未嘗悲孺苞之困厄也夫非衣氏所謂諸天著樂不暇精修人懷慮危可趣正覺孺苞當盛年掇高科藉令繼取一第如頰拾雍容細旃之上俛仰交戟之下含豪未竟而諛者在傍安得侘傺沈深之言而稱之能極其變以臻其所至乎孺苞復深於名理乃時拂問棘園一片石寂照澄觀昔之所遇時而徂徊時而悲憤美人香草之思邊馬河梁之感雖逐境輾轉於

吾前此中未嘗有動也故其詞旨溫穆和平可
以諷咏可以管弦庶幾風人之致也此天欲先
昌孺苞詩道耳豈欲終困孺苞哉孺苞行奏牘
金馬門將今天子發飄飄凌雲之思是什也其
爲陵陽之璞乎幸并爲我語仲玉伯度今
上行且前席問公等皆安在

孫雲巖先生偕陳安人齊壽序

予讀太史公書至陸賈傳未嘗不想見其人賢
且智智且達也夫當陸生時中國宛轉鋒鏑之

下唯趙他嶠疆南越乃陸生奉璽書狎之如狙
公鷗鳥能令雕結箕踞之長奉約束惟謹而漢
卒不加兵于越而越父老子弟終其世不罹鋒
鏑之苦者生之力也是則生之辭令賢于百萬
甲兵天下既定生獨優游好時之上出橐中干
金裝治生產歌舞鼓瑟時過諸子擊鮮供具以
娛天年何其達也越千五百年而得其似者則
雲巖孫翁其人也翁嘗爲南越保昌丞保昌固
尉陀舊國也時采金貂璫四出境上璫虎而冠

賜張益甚郡邑長送送以不如指逮詔獄守令
咸人人危彼中父老子弟不勝誅求幾成脫巾
之禍翁獨毅然身任之奏記兩臺陳晰利害中
機中權兩臺深加器異悉以調劑委翁翁謁中
貴極陳不便狀詞侃侃無少撓中貴色沮開采
之役遂中寢越民欣欣更生其事之偉吾未知
與陸生奚若時當路諸公無不交口保昌丞賢
薦剡交上旦夕且有卓異徵翁顧夷然弗屑婁
移書告致竟飄然歸臥故里中乃以暇日自逸

於風泉雲壑間時飭尊罍召舊所習賓客爲高
會不至丙夜不告徙其達之旨吾未知與陸生
又奚若翁少以文學傾邑庠生已游太學又傾
太學生尋拜鴻臚序班益能干官一
扈從幸壽宮再侍

經筵又再侍

諭祭壽陽長公主屢錫白金紅綺皆稱異數秩
滿外補江右峽江簿政績懋昭旣遷保昌丞其
措注之大又章章如是時薦紳或以翁非科目

稍易之及聆翁敷陳時事援古證今鑿鑿名理
每爲傾挹不覺席之前也南海令山陰王公當
代知名士時對抵掌未嘗不心醉已又曰夫夫
也者生遇右文之主雍容交戟之下其論列敏
給豈盡出陸生下哉蓋爲名流所推重若此翁
旣脫屣仕路日與內子陳安人爲德于鄉三族
之鄙恃翁以舉火者若而人兩造之爭藉翁而
敷口者若而人甃道繕梁無虛歲指困捐橐無
虛月黌宮久圯則首倡義以新之前後邑長式

翁廬兩借蜡賓爲倚重翁丈夫子五六人類皆
韶令溫文蔚爲國器諸孫十二森然玉立每旦
上堂問起居肅如秩如居然萬石氏家範今歲
十有一月十九日爲翁七袞初度辰而陳安人
亦一週甲子矣前一月二十日其設斝辰也諸
親友將謀登堂爲翁媪壽乃以辭屬予予竊謂
曩陸生引老於家適諸呂用事劉氏幾殆而陳
丞相絳侯卒用生策社稷以安生亦以是顯名
當代垂勛竹帛孫翁生邁重熙累洽之朝衍衍

林下卽有竒謀石畫顧安所施乎翁將苞其未
究之用以遺後嗇其未享之祜以養身其遐算
繁祉寧有涯耶卽百齡未艾也夫擬人者必於
其倫予讀陸生傳而有概于翁故爲論列如此
且用是以爲翁壽翁其韞然以爲當否

戴元統西閣草序

夫璠臺石室仙的神囂所以資玄真而鐘神秀
者詎非孤標絕溟而遠隔湫濁哉金膏水碧風
實雲子太上之藥也以其苞質清虛凝液英華

故能立蛻凡骨而銷塵滓若夫高人貞士希夷
窮岫冲漠中林舉則鴻冥處則夔伏引嘯則神
鸞叶音抒藻則雲龍鬻彩方將玄覽霄霓鬯滌
氛垢何可舉世而無若而人哉不圖輓近而得
之戴山人也山人家在天台鴈蕩間壁隴靚深
山水明淑夙具傲骨長負勝情鹿牀豹席取暢
恬寂一區之內曠若九州十笏之居冷然五嶽
且復几饒異書帳餘秘秩長日閉關終歲托疾
上自漢晉以訖三唐旁及眞詮梵筴無幽弗詣

逕度則神馬尻輪應感則天隨合響矢口而聲
聲諧而韻韻比而篇壹寫靈襟蕭爽高亮之致
不徇知不邀譽不雄成不虛賞不滯於境而能
轉境不侔於人而和以天昆侖渾噩無得而色
相工拙之也予少稱詩謬爲二三名流所許與
足跡幾半天下蓋於寒采變化之域跡山人爲
廣然未能超放自如如山人也山人一日惠然
過我山中出示西閣草四言則黃綺之遺音也
擬古則步兵之咏懷也七言古時而青蓮而氣
少異時而嘉州而旨逾冲五七言絕故自濯濯
各臻其妙七約則東阿陪乘景陽分鑣要之清
真閒曠情與景會景與心融不斲合而無不合
其入於道而出於技者乎山人又言嘗携五尺
童溯巖瀨泛西泠覽虎丘登金焦北固從大江
抵建業縱觀諸勝快然自足懷刺字滅盡而竟
無所詣已又南謁武夷君洄沿九曲仰睇三十
六峯若可拾束腓行淺瀨中水風激激蒲葦蒸
精如紫烟擷而餐之腹爲果然遂寄蹟名藍凡

三月人莫之測也其嘉尚足可想已余業謝埜
埃逃之蓬藿行將尋山人瓊臺石室間共證玄
真以營大藥乃抽其緒而卒業斯道藏之各山
汰濁揚芬實有望于山人也山人將無驅牛上
流而避我乎

送樊伯子遊燕序并詩

樊伯子童牙味道慕鼻倩紫海之游綺歲采真
追陰生青城之躅邈塵區如螳埵竦仙轡於霞
標隘滄海若蹄涔濯靈襟於天外夙招勝侶爰

叶高情蔭芝蓋以遐騫繕糗糧而逃覽訪文始
先生于青羊之肆尋四目老人于白鶴之峯或
探易於醬翁或授方於帽子仙仙乎仰白日覩
青雲不遠矣已而情牽維梓未忘彩服之娛詩
咏采芹更與青衿之選多歷年所坐捐盛時譬
彼享鷄居以鍾鼓節鸞鳳以樊籠豈所安焉非
其質矣於是撫往日之可惜慨白駒之易流悔
腐鼠之悞人命文螭以騰駕從吾所好無假太
卜之龜舉世何常寧待邯鄲之枕還吾故物一

肩朗月清風濟世大還半鼎玄霜紺雪遊朱門
若蓬戶向柳巷覓真人豔說長安莫不向西而
笑滂遊朝市方知卽俗爲真花外車聲會見兒
童迎邵子壺中藥餌莫令女子識韓康爰寫離
悰用抽俚語敢附霞籤雲笈聊伐芳草疎麻云
爾君昔思冲舉冲齡道骨成瑤笙聞碧落石髓
嚙青城寶籙龍文細銖衣鶴背輕玄心冥俗諦
塵謫緩霞征仍灑金壺汁還尋玉杵盟洞宮虛
列姓縫掖困諸生長嘯醒塵夢狂歌薄世情飄
飄烏帽側抖擻白衣行仙窟懸人境神臯指帝
京公卿迎薊子河漢問君平大藥能蠲疾雄談
坐獵纓武皇方好道應識歲星精

送古予上人入吳請經序并詩

幽谿有門法師以智者絕學倡東南則古予我
公其上首也絕若寶山晬焉滿月吾知其容相
也六鼇獨象巨霧曩屭吾知其負荷也玉府珠
丘龍堂貝闕吾知其苞籀也玄霖甘露香飯醍
醐吾知其法施也飛雲流月野鶴欄泉吾知其

無住也予嘗夜宿高明朝登佛隴則古予偕焉
放懷寥廓朗咏長川笠影卓天悅挹化人於琳
館策聲鏗洞儼追若士於鴻濛紫氣紛郁乎霞
標赤縣塊蘇於華頂眈八鴻如縈帶望三壺若
聚沙掉臂一辭於茲十稔歲當玄黠律應素商
公將浪拽越來指塗江左木奴丹而洞庭波楓
葉紫而吳江冷至若山名海湧峯號支硎靈巖
乃館娃之故宮北禪是戴顓之舊宅又若龍蟠
虎踞之勝控帝里於鍾陵獅子牛首之竒奠神

臯於天闢臺雨花而說法山有草以攝生斯竝
高真之靈嶠僊逸之玄岫也吾昔友者彼有人
焉乃若百谷校書凡夫高士簡栖才子東生寓
公莫不字挾風霜胸吞雲夢雄辨標雕龍之目
麗藻掩碧雞之辭咸鼓枻於玄津早殲機于世
鷺或示淨名相則青蓮爲金粟之後身或爲隱
居服則德耀從伯鸞而高蹈品目或表竒于流
雪琬琰或紹美于頭陀孤情絕照則道猷無忝
其徽音標舉會宗則安石定賞其儁逸談塵注

飛流于雲母靈詮滙衆派於谷王公雖以采真
尚友爲奇遊乎而尤以闡教請經爲勝事也飾
綈漬蘗悉輦寶葉之文瑤匱錦函盡發蓮華之
藏度之精舍廣示迷津豈非無上之盛心希有
之弘願乎故覺華長者得授記于定光空王如
來亦印心于寶手皆因造藏得臻果位補處作
佛非公而誰予寔顓蒙時沾法漣每象融於適
意無得而稱恒神契于忘言相眎而笑東林法
席未寒白社之盟孤嶼離筵聊擬碧雲之什錄
之素楮用代疎麻性海眞如藏虛空不可量師
將一芥子盡納須彌王耨池攝衆派帝網灌皎
光寶樹枝枝玉沉榆瓣瓣香爲霖同一潤立表
駭多方法苑開精舍天花積講堂驚桐委夕露
餘菊抱晨霜日出乾城隱雲飛覺路長會看龍
樹返娑竭指津梁

送莊令公入計序并詩

夫詩本緣情情生于愛愛斯思思斯永洵德澤
之入人信金石之匪固也故嘉穉繁滋于烏鹵

鄴中興時史之歌紫雲鬱術於庭階洛下紀石
卿之頌益部借文翁而更化冀方藉皇甫以寧
居鄧攸挽不留已縣思于吳什叔度來何暮亦
繹韻於蜀謠于公歸東海之祠石氏表臨淄之
社豈非物情之所嚮今古之同歸乎於鑠莊侯
寔鍾靈氣苗裔啓楚芊之始賞瓜瓞綿延陵之
舊墟邁跡華宗光昭前烈才華揆日振鴻藻於
江東精氣干霄燭龍光于斗畔劉家羣從盡握
靈蛇謝氏諸昆俱標繡虎蟻封盤駿荐魁蓋榜

於兩都牛鼎燁鷄暫試銅符于百里維茲甌土
越在江堦羅九斗於鏡中封一丸于掌上城頭
瑞鹿似夾鄭公之車天際飛鳧忽下王喬之舄
侯正身執物虛已推誠躬叢脞而弗辭恐一夫
之不獲疾邪憤惡恥斯民不爲三代之民錯節
芬絲綜國政爲一家之政至若清衷冰映雅操
霜凝公儀以却獻稱賢子罕以不受爲寶園無
鹿之可瘞壁有魚而長懸質畏人知縮令客媿
其廉介有如此者又若明懸秋鑑朗徹冰壺燭

幽不假乎著占摛伏何煩於鉤距壁分倍厚去
予咸得適其從鏡亦何心妍醜莫能淆其質人
稱詰匠邑號神君其明啓有如此者追乎煦如
冬日熙若春臺陳太丘之賞激人倫謝法曹之
獎成齒頰吹暖律則寒沍敷華假順風則穀籬
振羽展也藹藹令德溫溫恭人其豈第有如此
者或析楊臥草慈操不害之文獄櫓生桃仁洽
無刑之化邵農等賦版圖成畫一之規清詭銓
徭逋藪詘朝三之術用是俗熙郵治運洽綦隆

擊轅聲播於三農講德詩賡於四子茲當展覲
夙戒脂車蕭條去日之圖書伴侶來時之琴鶴
九重錫命已屬潁川萬姓懸情難留河內白窪
衡鼻士下澤畸人食土之毛拜誰之賜旣誨我
子弟復長我黎民周璆荷下榻之榮任棠乏拔
靡之喻鑄徽揚懿不辭身化貞珉戀別銜悲聊
假口爲石闕何以爲述詩不云乎肅肅者鳧言
北其羽維戾于征亦莫寧處朝發于澹夕宿于
渚嗟我懷人褰裳伊阻江之悠悠不可以厲舟

之搖搖不可以濟憂心如熏怙焉增喟右紕紕
我絲疇其繹之膻膻我疆疇其壹之侯之來斯
孔明孔徽玄風藹藹甘雷祁祁蚩蚩齊氓是徠
是綏翹翹皇士是式是儀我稼旣登于何弗粥
我卵旣翼于何弗育何以祝之適爾百祿又何
復之介爾百福於赫君子民之明牧右於昭明
堂計此萬方萬方來同車服斯皇明明后辟倫
物用彰顯顯君子嘉猷孔光施奕五絲備言錫
命受命于天克之斯聖受命于地植之斯正欽

哉欽哉民莫不敬右天子曰咨嘉爾良宰孰令
我民旣壽且愷玄澤滂流荒于東海其以翼予
曰女亮采累緝累纓懋茲無怠九山巖巖表于
邦國企其齊而惟侯之特惟以永歎矢之無斃

東園詩序并辭

樂成東臯之趾有隱君子東圃倪翁隱居在焉
居之東爲圃凡數十雙藝蔬蒔藥旁列松竹桃
柳之屬激澗引流日伍園丁抱甕荷鋤爲程令
勸則挾冊嗚嗚而哦或撫古瑤芳一再弄翛然

游物之表有以自樂也時邑中鴻流高士若朱
蕩南趙俟齋章千峰李后峰諸先生咸以聲詩
相上下彪彪稱盛雅慕翁高逸之韻納交定人
外契良時萃止翁爲湘葵蕨拂尊壘班荆桑陰
竹浪之下清言移日或撰杖東臯之上頽眺五
雲玉局諸山若波濤起伏大壑中或刺扁舟沿
月兩溪之涘擊石放歌夜不丙不休興至則探
韻爲詩錡然中琴筑客去則枕襪襖臥于于徐
徐望之有古逸民風翁旣長往諸君子亦相繼

化去惟餘篇章墨妙哀然成帙一日翁伯子曉
江君携冊以請曰茲所謂東圃之什徵諸先生
之寵靈以光被先子也者唯執事賜之序足以
不朽先子譬彼始以雲門亂以咸池夫乃不可
乎予慨焉歎曰夫東圃之爲圃也其游觀不過
薑畛芋區桃坪柳汧之爲適非有梓澤平泉瑤
林華池金埒之瓌麗也其寢處不過環堵窪衡
鹿牀豹席之爲安非有波樓月榭藻井蓮礎之
詭異也其適口不過茵飯芋魁濁醪清薺之爲

甘非有鰕胎爵騰桂蠹之膿臙也然而平泉梓
澤種種玆奇之飾者轉盼之間幻若蜃市燿如
電光惟凄寒蜚枯木蹲鴟而已迴眎翁之東圃
世有其業林樾若益而蒼蔚畦町若益而膏腴
絜彼較此詎不大相徑庭矧遺言之烺烺乎予
旣慕翁之爲人不及見復讀諸君詩撫焉有概
於中也語不云乎惟桑惟梓必恭敬止故不辭
爲役若曰志吾思而寓之辭耳辭凡三章辭曰
若有人兮圃之東蔭石泉兮巢雲松蔚矣匪豹
兮淵哉匪龍命飛鴻兮曷不我從羗思君兮我
心鬱懣圃有澗兮澗有芷寒泉汨汨兮白石齒
齒驟赤虬兮曷不我俟羗思君兮我心勞只圃
之人兮今焉適兮父析薪兮子寧弗克兮羗思
君兮我心惻兮詔來裔兮曷其有極兮

誄德錄序

上饒王侯治安陽之二三月政化大行捷於桴鼓
舉百里內外融爲滲漉禎蘇煦煦焉灑灑焉無
論品物生遂卽斷枿無不若蒸出菌芝也者於

是士頌于庠商謳于市更老扈峻鼓舞於郊遂
之外其神明變化之速前古未有也凡再閱月
方篝燈乙諸士子文俄疾作擲筆而逝舉國縞
素若嬰兒乍失慈母之懷易頌爲誄士哭于庠
易謳爲慟商罷于市更老扈峻易鼓舞爲擗踊
磨而號咷于郊遂之外其哀慕盡傷之深前古
未有也已檢其橐惟一裘一葛無長物於是士
民益感慟曰侯儉其躬而勞吾民固若是乃釀
金爲賻不閱旬得數百鑲而羸或曰是足以報

侯已諸文學曰未也之人也之德也弗崇祀名
宦豈所以樹風聲勵政教也哉采其行事請之
當道當道可其議卒修祀典如故事或曰是足
以報侯已諸父老曰未也侯雖永光俎豆乎然
未有專祠何以詔我子若孫弗諼之思已而庀
材鳩工不三閱月而祠成翬飛雲構肖象而事
之罔敢弗虔也蓋其入人之深之若此諸文學
已復哀諸奠章及哀輓歌謠請祀公移付之剞
劂題曰誄德錄旣成編乃以首簡授余余鄰氓

也寔啣沫河潤烏容以無言已作而嘆曰嗚呼
異哉昔朱邑歿就吏民葬桐鄉王渙絃歌薦食
祀洛陽史起尸祝鄴歲襮文翁廟食蜀教昌中
牟歲時社仲康清河老人泣世良彼皆縣以季
襪長我子孫漸摩淪洽適底于成固也寧有治
效若侯如是之亟疇非賢喆之用心遠厲前古
之烈者乎余旣異侯過化之神而復嘉與爲侯
之士民者好德之良庶幾前古直道夫天下理
亂係于是非之昭沕而已是非詭隨亂乃滋甚
如世道何余觀安陽人士秉彝之天居然三代
典刑也詎不于維世康俗有利賴耶嗚呼是編
也亦足以爲勸戒已故不辭而僭爲之引



汲古堂集卷之二十四

記

鴈山十景記

能仁寺

東甌何自无咎著



自樂成東行八十里抵四十九盤嶺踰嶺由筋竹澗過行春橋拾級數十武拓而為寺曰能仁為十八叢林首刹也寺左一峯聳拔天半白雲英英冠其頂故名常雲寺后芙蓉峯若負展而

戴辰火焰諸峯環而銜秀於堂廡之下火焰刻
刻上尋而色微紺峯下置巨鑊焉或云取厭勝
術以泄鬱攸氏餘烈若蜀之刻石犀以鎮水恠
觀名屬玉以禳火災耳下有鴈渡堤經行峽燕
尾泉下培潭諸跡類皆清蔚鴈山諸槩咸雄拔
瑰麗故以峯泉洞壑勝茲寺四山映帶若剖千
葉青蓮中而建寶王刹故自沉沉幽邃遊者自
大荆來首歷石梁次及靈峯諸勝耳目貽愕厭
飫之餘眡此似若落落無竒者余友楊生強爲
解謂諸景若散聖神通遊戲變現霞譎波詭種
種恠異彼以常雲一峯上黨於天爲衆山父若
如來不動尊自足屈下諸竒也余謂若爲茲寺
左袒非篤論然遊者自茲始後及諸景斯得顧
虎頭啖蔗法漸入佳境耳

大龍湫

朱蕩南先生龍湫志畧云湫水合四山谿澗爲
巨淵淵側石檻有龍窟深黝不可測檻中作微
凹削壁數百仞水從凹中瀉下望之若懸布隨

風作態遠近斜正變幻不一或如散珠如驟雨
如飛雪如輕烟或飄轉斷續或左右飛散或直
下如建瓴或屈曲如蜿蜒或細瀉中琴筑或大
注撼震霆種種竒態不可名狀余讀之灑然神
逞前後凡三至顧瀑水雖多竒第不甚讐朱先
生言意先生文人好竒多溢語耳萬曆丙戌冬
余偕東吳朱在明撰杖往晚至能仁寺大雨陡
作夜分乃已五鼓枕上聞空谷風水聲若百萬
戈甲相摩戛余攬衣趣諸君行凡三里至錦谿

谿石如砥紋理璀璨碧流寒駛陽景媚之光益
瑩徹清沙的皪綠蒲丰茸班鱗文雉上下若乘
空信如白地明光五色纂組耳山間寂如太古
微聞石上拄杖聲稍進山翠益逼皆天無游氛
不雲而雨已乃知湫水濺沫也再行三里許一
峯當中流上千數百仞垂杪而岐曰剪刀兩崖
亦陡絕雄拔小立寒嵐淒清益衣而進谷轉耳
根淵淵若聞輾萬轂過馳道中足底踉蹌爲動
客皆大叫稱絕竒仰見瀑流與風相鼓翕俄頃

萬態忽中爲風所遏半壁嫋娜久不下忽風從
下揭輒天矯若玉虬騰擲空外忽勁如萬鏃注
射人急走避詎那菴瓦溝若跳千斛珠檐端懸
溜如秋雨亭午風稍和日腳穿雲罅斜映高壁
彩虹數道絢爛炫眇余偕諸君扶掖憇瀑後厓
中剝若半瓠瀑布前挂水色與日色相盪摩如
坐石齊奴紫絲步障中眇人面咸有異色作青
紅熒熒不定狀朱君屢引觥船遽醕客咤爲生
平竒觀余於是知蕩南先生言非溢猶恨其不

盡究也夫瀑一而已風與水交相濟則山靈不
自愛其竒或水壯而風殺風壯而水縮咸不能
窮湫之變惟所見適遇適不遇耳予嘗聞登岱
宗不見日觀非遊也然日觀非極晴明不得見
陰雨曠濛春夏六之秋冬三之已霽而登登而
或翳已雨而阻阻而或舒於是登岱者十不一
覲焉信遭之不易也余於鴈山非不數數也於
茲始睹湫之變徼寵山靈良腆哉

靈巖

予嘗謂造化之於物曷意哉若水之觸石也不得不澎湃溯洑風之扣牝也不得不調調刁刁松韻之於簧也雯蒸之爲霞也造化於物曷容心於其間乃於靈巖裝綴之竒位置之巧又疑造化似若有意也者靈巖外戶固無竒兩厓壁立若闢巖關稍入萬峯林立中拓而廣足量萬牛而諸竒畢萃焉背懸巖屏展橫亘二里許半壁爛爛若五雲曰平霞障障之趾清曠若步廊者曰安禪谷左右天柱展旗二峯爭雄競爽窮目之力不盡其杪已而崇峦恣恠石林林總總售竒效靈於兩廡間令人目謀心會應接不暇左峯之巔有石若累丸者曰紺珠方堵若設屈戌者曰石屏展旗之腋有洞甚深窈捫葛而上人憑石檻若騎衡上有圓竇望見隔山天影如懸鑑下有深淵黝無所見以石投之聲輒鏗鏗厓端跌伏而昂首者曰蟾蜍是則東序之事始旣右峯若相顧而對舞者曰雙鸞挺而亭亭古松盤攬其頂者曰獨秀銳而膚立者曰卓筆烟鬟

雨沐若凝睇者曰玉女是則西序之事始旣迤
邐深入則小龍湫龍鼻水九曲橋劍峯泉諸竒
不可以僂指計直抵則僧拜石鉢孟峯又若森
列於几席之下環而睨之旌旗壁壘大將奄廬
無以喻其嚴肅也寶幢華鬘法王化城無以喻
其妙勝也珠林瑠樹羣王之府無以喻其瓌麗
也山靈信狡獪哉予曩偕鄭邦章中丞夜宿山
樓四望寒月如積雪諸峯偶立露氣嚴冷不覺
神恬形釋中丞謂予是地宜倣句曲陶通明構

三層閣異日與子兀傲其上日夕吸飲靈爽之
氣凡骨不難立斲耳忽忽十餘年今中丞方出
山而予亦見二毛山靈未嘗謝客而客斤斤奉
七尺若春蠶吐絲自縛豈不大可姍笑哉披圖
爲之憮然

龍鼻水

從靈巖右脇扳危磴轉而蛇行經獨秀卓筆二
峯側拾級復登數百步兩崖垂合而闢者曰龍
鼻洞厓端石龍長數百丈蛇蜒下垂鱗甲悉具

石理作縹碧色中爪陷入厓中若攫挈狀龍首
下垂去地不十尺鼻端小穴泉涓涓時下一滴
石盤承之香滑甘冽足傲神瀆而凌玉酒余爲
一軟塵坐若滌大都名山峯峦以其形似者錫
以嘉名屢得其髣髴耳然酷肖惟老僧巖與龍
鼻水稱最竒詭洞口玉女峯適相對余笑謂龍
得葉公之似若玉女者如曷鼻魁肩何寺僧從
傍曰春夏之交峯巔躑躅花亂開宛若村姑縮
兩鬟插彩勝故自妍媸余復戲曰第恨腰肢不
作渚宮舉止直女中笨伯耳爲之撫掌大噱僧
亦听然第不知予言云何

淨名水簾谷

淨名寺久廢故道亦荒蕪不可辨遊者或問水
簾諸跡輿夫給以久湮輒馳去余嘗三至其地
始從林間小田塍轉達溪岸遙望層巒簇簇曰
蓼花峯寺故址在焉石幢斷礎離離榛莽中何
論昆明劫灰哉漸進二舍許兩山皆純石綿亘
二三里曰鐵城障言言軒軒竝若百雉之郭間

選溪石小坐仰見高天若翠幄厓端猿狖唧唧
嘯向人又若舟行三峽中也再入爲水簾谷水
自洞頂飛撒若明珠數千百琲晶熒奪目洞旁
藥草色如綠珩微風拂地翠光作浪秀色若可
餐右側有初月洞洞傍舊有屠山人隱居處余
嘗謂鴈山諸景皆跳處一隅獨淨名介於靈巖
靈峯間又復輔之以響巖之勝且夷曠可廬杖
藜昕夕足可攬結諸竒桑麻鷄犬居然秦人日
月澹邪蟹堞宜秔稌來麥復有竹萌茶薺昌陽
黃獨之饒可以服食第恨兩厓太束不甚受日
光非栖真吐納者不可處或云日服鞠芎山精
粉一刀圭足以練靈明而汰陰滓豈山川固有
待邪抑世乏孫公和梅子真其人邪

靈峯洞

出淨名可五里許遙矚天際靈芝峯婀娜若可
拾隔溪翔鸞五老仙掌諸峯又若揖讓肅容者
稍迫靈峯兩巖造天中闕爲洞及抵洞口仰望
洞中飛磴逶迤數百折若懸疋練稍深入石扇

蔽虧晝色熹微若清旭始旦磴窮乃達平臺臺
方廣可蔭數百人爽塏穹窿恍挾飛仙尚羊天
半中設大士像傍列十八應真洞口飛泉時墮
冷風中若飛絮冉冉左方有性井寒沁而甘吸
之毛髮皆爽頰欄下瞰洞口携具小奚奴蠕蠕
如蟻余大呼聲隆隆鬱而弗吐若數部鼓吹奴
初至輒驚悸瞪目左右視欲反走已知人聲亦
呼而相和已而相樂也予憶廿載前初至靈峯
計入洞已迫下春時洞中一老居士方舉火喜
客至卽爲供茗設豆粥復爲謀臥具甚周先
有成都行脚二比丘已宿齋結跏趺坐佛火熒
熒風泉激激余與楊生相對蒼然隱隱毘耶丈
室會上也頃之皎月清瑩可數毛髮予復出洞
口倚石長嘯山中鸛鶻咸驚起軋軋掠長松而
去顧楊生不能從也嗣後凡數至而老居士已
化去無爲煬竈者坐是不復止宿每塵恩中想
像茲遊以當濯魄冰壺耳

東洞

有宋太平興國間禪僧全了經行至東洞聞巖
中童子誦經聲圍繞作禮竟於焉結刹名芙蓉
菴後因高厓有飛來石羅漢復名羅漢寺相傳
羅漢自清漳航海來將禮諾詎那遺鮫適遇樵
者卽躍上高厓立化爲石其語頗恠誕不經傳
疑可也地有石船按山塔諸蹟寺久榛蕪惟聞
風泉松籟聲若昔之朝鐘夕梵相和答而已

梅雨巖

梅雨巖僻在鴈山西外谷無論遊客杖屨罕至
卽詢之山中人亦鮮有知者余鄉梁進父文學
嘗一再至咤以爲竒余偕在明遊適進父請爲
東道主亟津津梅雨巖愆患甚力遂決策取道
從長嶽原入山長嶽沙土犖狃原隰樹烏柏動
以萬計時初冬柏葉着霜如丹砂筍輿穿紅樹
間二十里衣袂皆紫若馭冷風從天台赤霞中
逕度也已入靈雲寺故趾縱覽鬪鷹巖九龍山
諸槩便覺奕奕清舉繼至梅雨巖則兩石挿雲
對峙飛瀑自厓顛垂下半壁一石特墳起瀑勢

春激深射亂注霏霏若烟雨風排之陣陣過絕
壁若曳霧縠冰綃於空中也對瀑爲含珠峯大
小天柱皆偉觀在明起浮大白謝進父曰嘻觀
止此矣進父謂在明日茲景較之靈巖靈峯諸
勝直齊魯之與邾莒耳在明又不覺爽然自失
也

石門潭

石門潭在鴈蕩之陰十八灘之委瀦而爲巨浸
焉沉竿續蔓莫底其止廣可數十晦兩山夾溪

蹲踞勢若虎鬪下望竝若天門云中有巨鯉長
丈餘每遇風日和煦輒從容揚鬣水面小魚景
附者以千計土人常夜見赤光上燭潭水盡紫
蓋神物窟宅也地主干識夫云曾於月夜刺兩
艇以巨絳聯束之與客携酒具轟飲令小童吹
紫簫一再弄簫聲挾秋氣爲益雄殊有穿雲裂
石聲夜半古泓聞殷殷若雷鳴客思而散嗣後
無有繼其遊者

石梁洞

遊客從西來者過謝公嶺登石梁洞而勝事始窮然操蛇之神技亦殫矣梁橫巨洞口若偃虹左復下垂插入地呀然中啓若兩扉踈級而上入洞中洞軒敞可容坐具百餘洞後有水汨汨注爲小窪味甘冽不減品外泉引領南望則老僧巖兀立天際宛若比丘衣糞掃衣現由舍那身聽雪山老胡說法也見者無不駭然大粲鴈山諸景頗借附近峯巒助竒而茲洞獨介然特立無所因藉若孤高士自標一幟亦可尚已然遊者方倦登頓樂趨夷衍至此則平原膺膺孔道委蛇又若重趼出九折阪而卽康莊也

游習家池記

予自雲杜取道抵鄖襄先一日李本寧太史觴予於甫栢臺顧謂予曰子馬箠且西西至襄陽襄陽據江漢上游環郡名山逞昔名賢之蹟往往而在襄陽守王君非子之里人耶子非不足糗糧也非不足扉屨車徒也第乏勝侶之與俱子盍往見馮生見之馮生負竒自喜雅游山水

間子其訪之襄城之埜予謝而領之次日辭太
史行凡四日至襄陽是爲四月晦日乃往詣襄
陽守予請以詰旦游習池公遣二騎以從予歸
僧舍適客有造予通刺知爲馮生見之也把臂
劇談如平生驪遂訂詰旦習池之約旦日昧爽
荆門劉元善過訪談少頃謂予曰先生僕馬在
門將爲習池之游乎僕故人劉伯子俠烈多節
槩委蛻習池之阡墓草宿矣今且齎絮酒一酌
伯子尋當追隨杖屨於池上可乎予曰甚善遂

逆見之於道見之復與王汝賢將軍期不果汝
賢快士也爲之惘惘卽並馬出文昌門南行數
百武夾道皆高槐綠陰交映茅茨隱見便覺灑
然再行二里許山逕犖塹陂陀上下款段行亂
石中益蹶躒不前岸漸迫入江江流滌洄如帶
隔水鹿門南陽諸山依然如昔而賢者不可作
矣道傍古塚纍纍斷碣林立不勝悲風白楊之
感復行里餘沙中片石署曰杜甫故里予下馬
低徊久之髣髴往跡於殘烟斷草間覈其遺蹤

舊趾已茫然不可考爲之一嘅復循江行二里地漸高山麓墳起松栢蒼鬱朱祠翼然爲羊叔子祠祠前有亭中樹御製穹碑

肅皇帝起自潛邸嘗經此地親爲撰文諭祭又五里折而西四山環抱若藩屏中隩而曠山皆蜿蜒不生草木一徑循山趾入中漚爲陂塘受衆流菱芡荷芰田田水面亭抗其半予與見之解衣箕坐亭下四面皆高柳掩映陂水水爲縹碧於暑益快少選羽流斟澗泉淪苦薺供客予

輒盡數鎗笑謂見之曰此水昔劉固無減中冷惠山也惜烹法不按鴻漸火候耳爲之一噓頃元善從劉伯子隧道攜劉仲子同勛至同勛以元善往酌其兄墓夙亦庀酒榼至因坐共飲見之笑謂仲子曰伯子有第豪爽乃爾何必伯子在也出亭循短垣轉東拾級入門有堂三楹軒敞爽塏堂前有臺廣袤二丈許臺心爲高陽池舊蹟池縱丈有只衡亦如之淵渟作蔚藍色白石齒齒朱魚千餘頭出沒上下從容可狎池上

有亭蔭之堂右祀東漢郁習晉習鑿齒山簡唐
杜審言及孫甫郁卽習池所自始主人也是爲
五賢祠祠前有亭頗宏麗楹楯左右皆一時薦
紳題咏予不暇讀亭外山四垂飛青牒翠映帶
遠近予亟呼酒偕諸君分曹劇飲稍已沾醉見
之以謂茲亭不能盡領諸山之勝更命移尊戶
外藉草列坐高柳中柳下泱流自習池出瀧瀧
走田塍間岸傍古柳橫俯水上如渴猊狀予乃
箕踞濯足上流拂拂若泛貫月槎亦一快也見

之因澗水爲浮觴水淺膠杯見之命童子以草
泥壅下流水浸溢因馳侍者於上游浮巨觥諸
君爭從下流攫飲以不得多醕爲負於是予與
諸君茗芋竟醉矣見之擊石歌李供奉晉朝羊
公一片石龜頭剝落生莓苔清風明月不用一
錢買玉山自倒非人推之句向予曰達生哉謫
仙人之語也予曰古人寥廓陵谷變遷今之陂
池臺榭或異於昔乃罨如岫如爲山爲阜者固
非有異於昔也今寓內丘壑若斯類者在所不

乏乃獨茲山聲光列於圖牒紀之咏歌至今千
載而下騷墨之士過而歔歔興懷若有不任其
情者豈非各賢之蹟耶因憶昔人有言曰西望
隆中想臥龍之嘯東眺白沙思鳳雛之聲北臨
樊墟存鄧老之高南眷城邑懷羊公之風縱目
檀溪念崔徐之友肆睇魚梁追二德之迹夫芬
芳起于椒蘭清響生乎琳瑯命世作佐者必垂
可大之風高尚邁德者必有明勝之事嗟乎嗟
乎古今同慨矣已而暝色入林禽鳥相呼如趣
歸人遂驅馬而去馬上各占一詩閱明日予追
紀其事

遊武當山記

萬曆丙申五月余客馮元成大叅郎城署中凡
二浹旬日唯婆娑一室時時夢中作大赤清微
想六月一日大叅行部襄陽余從公乞一力爲
太和前驅客有笑余曰大暑鬱勃鑠石流金突
屢涼臺無陰可憩子欲撰杖絕壑層厓之巔穉
穢攀援疲於重趼然徒見噓山靈耳何論濟勝

甚矣游計之左也余曰不然余將昧爽而往禺
中而止蔭茂樹濯寒泉折華翳日披襟遡風偃
仰長林輒復移晷當其六龍亭午火雲揚旌余
方箕踞青霞蒼霄間下眎人世炎埃堀堞則客
所謂突厦涼臺皆火宅也客無以應遂於是日
決筭行出止唐德觀遲輿夫久之午後出東門
環郭而南蜿蜒崕嶠皆荒岡斷山童然如禿連
亘百餘里漢水映帶逐勢宛轉亂石蹲踞若鼉
鼉隱見水面筍輿沿江上下六十里至遠河時

日已迫濛汜矣遂止宿館舍初二日五更發遠
河曉色陰雲涼思蕭爽行十餘里微雨泔泔久
之益甚輿夫行泥淖中二十里廼趣田家小憩
傍午雨止出田舍行五里爲黃洋岡天益開霽
時久亢暎四郊得雨若益蔥蒨登岡遙矚高山
屏展羣峯合沓蒼黝深蔚如千葉青蓮華掩映
天半白雲斐亘若水綃素練橫亘其下山顛綵
霞若朱旛若羽葆種種竒詭不可名狀余覺有
異因指詰輿夫知爲武當絕頂也躍然神往又

行三十里至均州過淨樂宮宮闕敞瓌異金碧
絢赫藻績雕鏤若鬼若神可謂殫極人間鉅麗
之觀矣其寬廣幾割州城之半殿左爲紫雲亭
構撰益精是爲祝釐之所道家以謂當神農時
均爲古淨樂國真武嘗爲淨樂太子宫由是以
名武當蓋言非真武無足當之也又名峯上又
名太和文皇賜名大嶽世宗復勅爲玄岳以冠
五嶽云初三日出均州望岳門石道如砥道傍
夾植高柳陰若環堵四十里至迎恩宮又十餘

里四山漸入幽邃山黛亦稍稍加抹又里許兩
山垂盡若闢而敞表以石坊署曰治世玄岳又
里許馳道益整道傍爲沐浴堂爲修真觀又數
百武山勢恢拓左右襟帶杉檜萬章行列井井
仰視遇真宮朱甍翬飛亭亭林杪宮後倚鳳凰
山鴉鴿嶺右峯光律而萃者爲望仙臺前峰蟠
曲而俯者爲九龍山廡下有張三丰像并銅碑
小影三丰當
高皇帝時嘗結廬於此文皇屢遣使以書招

之不得因賜號真人并銅笠銅杖今御札制誥
羽士珎匱完好如新余因挾羽流尋宮後小逕
登望仙臺列坐松根流覽諸峯目謀心會形神
殊適適羽流携酒至後口宮觀朝謁之盛余稍
爲指點品隲幽勝皆憤憤無有領略者殊敗人
意乃立醕三卮下宿方丈初四日出遇真宮里
許有門翼然榜曰仙關兩山陡立石道徑其中
林樾交蔭灑然非復人間世又二里爲元和觀
再折而東二里許地忽清曠平疇廡廡宛然村

落畊者耨者餉饁者飲牛者舉桔槔者時絡繹
田塍間若從圖繪中所見桃花源境又行二里
遙見峯巒外抱地形中廓棟宇鱗次雲蔚霞興
儼若千家之聚者爲玉虛宮玉虛之制爲宮爲
殿爲廊廡爲亭臺爲丹城爲彤墀規畫視遇真
淨樂無所損益其大可兼淨樂之二遇真之三
殿兩序懸以銅鼓石魚擊之訇然中節羽流以
謂出自土中不知爲何代物殿之左爲望仙樓
八窓空洞環以欄楯循欄回繞四望烟嵐繚碧

面面可攬結也樓下爲雪洞洞前有聖水池折
西而入爲三丰洞流憩久之輿夫趣行甚力登
輿從殿後小逕窺叢莽中十餘里始達孔道石
磴上下內倚斷崖外臨深壑古木輪囷大者百
圍懸綴陡壁根纏纏連絡亂石中壽藤夭矯緣
木而上糾結林杪飄風怒號恍若龍蛇鱗甲奮
張至此耳目駭愕頗詫詭異又二十里至太子
坡坡躡級而上迴旋九曲夾以朱垣垣盡爲復
真觀觀亦幽絕時已下春余欲託宿觀中黃冠

不欲止客意色甚窘余遂揮輿夫出行數百武
至十八盤礪道降陟巉巖間樹亦茂密不夜而
晦只尺莫辨盤磴垂盡目境忽朗曠若發蒙仰
睇返照猶熒熒山椒未斂也負山爲龍泉觀觀
臨九渡澗澗上誇以石橋縱可十丈衡半之橋
下清流縹碧時幽咽亂石間淙淙如中琴筑倚
橋四顧草木蒙翳峭峯周遭如入困中仰見天
影少選新月初吐濕翠襲衣又如坐清油幕中
生平幽討之趣於此信可忘死舒歎低徊不欲

就枕顧安得吾黨二三勝流舉白相賞以蒼清
既因吟康樂惜無同懷客其登青雲梯之句爲
之悵惘初五日出觀行三四里道傍棹楔曰玉
虛岳別穿一逕甚微似若久無行蹟者輿夫難
之第謬言無它竒谿谷寥夔不足辱眉睫也啓
余興不可已且復怖以多虎余乃舍輿徒步賈
勇而前兩奴跟踣尾余後輿夫頃亦至逕緣清
溪兩旁峭壁摩霄逕石屢斷屢續信猿狖窟宅
也溪流濺濺文石齒齒綠蒲玳草蒙茸澗底秀

色可餐仰瞰青天如一綫初旭盪射兩厓樹陰
濃翠淡綠變幻萬態余且行且憩恐其易竟也
兩輿夫相和大呼聲應牝壑若出數部清商冷
泠久之乃止行可五里高厓孤懸勢若欲仆傍
厓劊石半之外輔斷木爲棧曲折以度數百步
得地少坦左折梯而上中有小殿殿外架壑爲
臺朱欄四繞瞥若尚羊天半便覺兩腋習習風
舉白雲剡剡從厓巔出久之目眩厓若振動恍
與飛雲頡頏低昂爭馳天際厓石班駁纂組如

霞綺縵理起伏作波濤狀下眎人行深澗中蠕
蠕如蟻真奇觀也頃循舊路出溪口登十八盤
行深林中十餘里至紫霄宮沿逕亦饒奇石紫
霄勢若建瓴後殿特聳漸至步廊輦道亭臺以
次而降益覺雄峙兩旁羽客丹房遠近高下星
分棊布殿負石障曰展旗峯左右竝若華表曰
大小寶珠前有日月池七星樹外有陂瀦水淵
澈其源自金水渠下注廣可二畝而羸曰禹跡
池復從殿後拾級而上數十折至厓半曰太子
巖下有洞甚陜相傳真武修真處中有平石如
座承膝處光若髹漆可鑿厓折而升有小山隆
起者爲道書福地七十二之一也稍降爲賜劍
臺臺前五老爍燭諸峰亭亭若在籬壁間物載
折而降爲萬松亭亭外松杉偃蹇如蓋迴望展
旗若建牙日色欲晡下至方丈宿焉初六日早
從山右脇躡級而上逕頗陡絕又行里許至烏
鴉廟已渡灑穀嶺嶺界兩山旁皆絕峽中衍如
隄嶺盡折而西行峯愈奇峭林愈窈窕五里許

爲榭梅祠祠下榭梅二本柯葉扶疎故自濯濯
又二里漸迫羊橋萬丈嵩呼千丈諸峯卓立雲
杪時聞鍾磬若出半空止輿仰觀乃知方士結
茅懸厓之下狀若贅疣爲之齟舌卽道人虎皮
張修真舊址竊恠彼何所自往藉非乘躋御氣
之士鮮有不慄又行二里衆峯益迫磴亦隨險
水激激噴薄樹根亂石中是爲武當澗又數百
武至朝天宮輿夫氣不暇平余亦艱脆股栗乃
舍輿單綬徒步而上仰眎鐵絙危梯廻旋百折
自峯頂下垂猶之空中曳帛屢喘屢憩梯循峯
勢險夷幾數十百盤歷天門者三始至太和宮
羽士架屋崖顛如累棊或至五六層下俯千仞
上盈下縮狀若壁燈風蓬蓬起礪壑中構檻輒
軋軋有聲顧羽士寢處其上晏如也余兩足如
臏負風欲僵乃從太和方丈午餉沐浴久之神
色始定出登天柱峯以布繫腰間命兩夫曳而
上顧兩邽時相擊頤頰間又數折入紫金城城
依削壁巖危架險繕甃精固非驅石神鞭不能

辦可謂力侔鬼工矣入城拾級數折爲元君殿
爲靈官廟爲神厨折而東爲古銅殿制亦渾成
簡朴爲元大德年造再歷梯數級始達天柱絕
頂四周環以石欄中爲金殿開牖東向棖桷拱
椀柱礎窓櫺製作工精中像玄帝擁護諸將森
列左右以至几案爐瓶悉皆塗以金液焜熿燿
葩逼皆不定作禮畢凭闌下望香爐熾燭三公
五老玉筍天馬鷄籠諸峯若供若獻若拱若立
目力稍遠則萬山叢伏或如儀仗鹵簿或如翠
葆珠幢或如鸞鶴圍繞或如百獸率舞或如萬
方輯瑞逐影肖形不可殫紀縱目遠窮則南自
汝鄧西自荆楚連嶂奔騰纍纍總總如丘冢之
封殖北邙波濤之澆潏巨壑也漢江繞其下厖
如衣帶余爽然自失翩乎僊僊歛忽神游八極
之表徙倚移刻畏日驕蹇且欲褰裳下山羽流
止余於南廂小閣且曰雨立至矣少選雲霧四
合下眎臺外彌漫一氣則嚮所見陵阜丘垤皆
茫習不可辨唯三公五老香爐諸峯頂時露雲

氣中乍隱乍見時若鳧鷖點點出沒海上無何
風駟雲片冉冉低度如白馬如翔鷲如裂素如
擁絮風止雲盡則山色嵐靄依然也余西望香
爐峯之半有逕若綰帶因問羽士彼何所往羽
士謂余言野人范丫髻結廬處其人頗可與語
尋當拉之俱來余曰真逸可坐致耶又指爇燭
峯向余曰此下故多雲衲間有異人余遂循磴
下紫金城披榛尋香爐小逕時時援松枝乃得
上西折凡二里始至柴關剝啄良久童子應門
揖予而入野人出迂客共坐土室落落穆穆頗
覺疎暢叩其語殊鄙俚如嚼蠟予竊疑之意謂
道人玩世聊示其麓耳中未可涯涘也復有頃
大言其曹耦御風道人者語屬持其陰事不覺
爲之捧腹委頓而返下香爐峯復尋故道數百
武小憩松陰下有逕北折適有居士休涼者因
問居士此當何之荅曰由此而北可抵瓊臺觀
爇燭澗頃復北指謂余曰何處尋范丫髻此中
大有人掉臂而去余爲悚然乃循其後不覺至

瓊臺觀沿逕有金童玉女旗竿諸峯皆拔地離
立無所附綵余再揖居士問曰居士向者爲誰
居士第言殿後屠廡有憨憨道人者吾不知其
他予復問居士爲誰听然向余曰我瓊臺觀傭
作耳何以姓氏爲余乃踵殿後小逕道人方跣
袒綠陰中不爲容主禮但云何乃從烈日中來
願指片石曰此可小憩予覽其風貌高逸翛然
有度世之表移時不交一言予乃乞師作一轉
語道人第舉拂子曰子欲潛修密鍊先治爾心

毋拈枝葉所謂至言不煩目擊道存矣時夕陽
在山予亦飭甚不及過爍燭澗乃辭道人出道
人因謂予曰覽子之貌非庸庸者幸善自爲計
神仙去人何必有間負才寡識此叔夜之所以
見誚蘇門孫生也子其勉之予爲之惘惘若有
所亡者久之復循來逕尋方丈宿焉初七日從
三天門下至朝天宮乘輿趣南巖宮則昨所歷
若羊橋萬丈諸峯會真橋武當礪則又髣髴若
夢境矣復從榭梅祠灑穀嶺憩雷公石過南巖

南天門折而下爲碑亭爲大殿從殿後掖門入見石广橫生跼跼欲墮狀如曲旃上有巨人跡隱隱可見又數十步爲元君殿爲啓聖殿爲南薰亭殿後懸厓斜覆千仞中多小穴如燕壘穴中填以五百石靈官宛若影壁厓端蒼松翠栢皆蟠曲倒垂如流蘇如寶蓋下爲石壇壇外護以石欄下臨絕壑天柱插漢前峙如青螺髻頃有微雲冒之予戲語羽士此所謂無見頂相左右七十二峯環列森繞壇外如空青曲屏丘壑清華當無踰於此矣稍折而上爲禮斗臺逕復下折可二里一峯卓立峯半爲捨身厓攬其杪有亭冠之爲飛昇臺相傳玄帝昇真處午後謀往虎耳厓訪老僧不二出宮後間道行五里許忽聞竹外鷄犬聲又若遺身白雲也林轉爲虎厓茅菴三楹予入菴禮佛畢有頃不二至邀予共坐竹榻輒刺刺人間眷屬恩愛離別種種可悲可喜事忽笑忽泣極其形容言雖淺近托寓甚隱予獨憬然深領其旨間雜謔浪無非宗趣

命沙彌作伊蒲供飭已乃引予繞菴後斜而上
至峯頂觀蓬室方池叢卉美箭澗瀉潺湲石刊
梵字頗極秀野枯寂之趣已復捉予臂曰和尚
頃與若語於意云何予荅曰師言自著而微自
淺而深顯密互融空有雙遣此所謂深入不二
法門也師曰有是哉莞爾而別出菴取道五龍
宮行十里至仙侶巖巖畔清流泚泚曰百花泉
又二里爲仙龜巖又折而東爲滴水巖巖若覆
鍾水自巖頂時下一滴有池承之晴雨不減又

二里過竹笆橋林樹蔽芾境益瀕洞二里至白
雲厓仰瞰五龍若在咫尺又五里至青羊澗志
稱爲文始真君舊蹟夾澗絕壁石脚插入水中
樹影與潭影鬪碧作翡翠色澗底亂石凹者曲
者窪者突者如斷珪如殘壁如藥磨如磬曰可
泳可沿可踞可倚可晞髮可濯足可施酒盃可
支茶竈種種具備過青羊橋曲折陟嶺凡十餘
憩方至嶺顛予脇息萬綠中斜日入林翠陰濃
淡落霞曳彩時補樹隙交相映發表裏虛明如

坐滇南料絲屏也又數百武至五龍宮宮後山
勢騰躍如龍翔虬駭前面金鎖紫蓋二峯階前
五井爲五龍井泉皆甘冽上有天地二池右有
日月池月池色黛日池色赭朱魚數千百頭游
唼藻荇可狎旁有小殿肺附宮左內供玉像五
高可七八寸皆鏤碧玉爲之羽流以謂出自瘞
中石匣不知然否出宮可二里爲凌虛岳又二
里爲自然菴舊爲孫思邈陳希夷隱居五龍嘗
於此授希夷睡法再折而下爲希夷誦經臺下

臨桃花澗臺前後青楓文杏羅繞交蔭如行步
障臺後有石廣可二丈平如擣礎曰晒經石載
折而東里許至華陽岳中有穹碑刻勝國李浩
然小像畫法類吳道子上有自贊及摹壁間記
知此地爲李所搜剔也有頃片月從林杪出庭
陛階除無所不受予獨徘徊露臺俯眎廊廡山
門碧瓦瑩皎如雪又如積水流螢青黃自照殿
上鍾磬殷殷出翠微鬱而不吐者久之已而兩
廡道房琳瑯笙管四起相和如聆咸池雲門隱

隱天路也內顧靈腑清朗毛髮森爽超然有餐霞絕粒想乃知自逸於山林者以軒冕爲桎梏榮名爲土苴信非漫語初八日出宮山行三十里復至玉虛宮道中所歷老姥祠磨針澗仁威觀及五龍行宮無非佳境不能一一縷悉臚述也午飭至玉虛晚行十餘里宿遇真宮初九日復從故道至均州淨樂宮遂爲之記何自曰今神僊家所紀載弱水十洲不盛言其琳庭玉闕璿室瑤樓鉅麗之觀則必稱神獸珍禽靈草竒樹族產紛葩之衆在昔萬乘之尊若秦皇漢武力不能一至焉徒託之想像髣髴褰裳濡足而已若夫玄岳宮殿觀宇金碧焜熿大者侔閭闔紫微少者壓靈光景福班麟赤豹玄熊白鹿朱草黃獨榭梅僊茗往往而在無論簪紱騷墨圓顱方趾之士卽田婦牧豎輿皂之人皆得親覩其盛彼何所取十洲哉古者禪主七十二君柴望之禮加於五岳寔以盤礴高明神君所宅宗長山川統攝羣品故王者受命告成也若夫玄

岳綿亘八百餘里高可二三由旬滲漉之功侔
於造化直擬攬挈岷峨伯仲崑崙卽五岳尊明
亦何多讓焉說者或謂茲山在昔泯泯一日遇
文皇遂膺特拜不啻超五岳而上之爲茲山幸
或謂宵昧旣啓靈真盡洩輪蹄喧逐羶穢蓬勃
殊非神明所宜止矣是以羽駕廻翔而不下森
輪橫空以逕度無論帝真卽張三丰謝天地之
流一何寥寥也爲茲山不幸或幸或不幸我又
惡乎知我請質之玄冥之帝

游滄浪亭記

滄浪亭在均陽之東後負玉峯前臨漢水古孺
子歌濯纓處何子謁太和還再宿淨樂旣辭帝
所復之人間昔之靈秘清華之境乃舍我若遺
而人間之塵鞅交輻接軸復轆轤於前矣恍若
簡子之寤意怏怏不自得與一濯滄浪以少紓
其懷居無何州大夫林君詣余余告以杖屨所
歷而復請爲滄浪主人大夫曰嘻不佞幸爲香
案吏寔宰太和日局於奉職期會歲不一至焉

卽滄浪近在廡下復糾於案牘簿領月不一至
焉子踣履而辱吾境不十日而奄有太和乃復
沾沾滄浪之水何子之不屬飫耶雖然子挾吾
有以寄其牢愁之思吾因子游而得以蹙摠鞅
掌之困吾兩人者交相藉也不亦可乎予詰旦
出城北門操舟以濟江干卽古槐渡爲汝之鄧
陝之商所逕道也是以鬻渡者以百計予旣濟
斗折而上數百武爲滄浪亭亭踞半壁下瞰大
江波光滉漾白鳥晴沙亦超然一曠觀也後再

折爲玄覽亭從亭右折而南踰級而上爲玉峯
菴菴據玉冕之半古柏蓊然栢下石逕錯以文
石子披襟其下耳根清籟謾謾若拊鍾鏞頃之
大夫至大夫屏從者於山半葛巾方袍神氣適
逸不爲風塵磬折狀已陳酒脯飲菴後太和精
舍精舍四周藩以若榴蒼桂前甃石爲臺雜藝
牡丹芍藥頗極蕭遠之致菴左右多隙地篔簹
萬挺沉沉却暑碧石清江隱見林外少史掃石
命酒予與大夫盤礴引滿就陰避峇尊亦屢遷

俛仰吟嘯觴爵交錯積然自放左右之人爭竊
觀不知誰爲太守也日暝下山予與大夫方舟
而渡水裔行旅擔者負者接衽聯趾趨渡喧囂
余謂大夫曰余不穀幸徼大夫之靈得爲竟日
之游衍衍然樂也今截江而渡者指不下數十
百而爲茲山一寓目者若而人哉乃知清華之
享天所靳也敢不拜大夫之賜已之申流烟際
漁舸鳴榔相荅復謂大夫曰今之漁父非昔之
孺子耶何久之不託於音也予乃扣舷倚和滄

浪之歌歌曰漢之廣兮豈撓而濁誰爲爲之匪
揚匪漉漢之廣兮豈汰而濇誰爲爲之匪激匪
澄毋塵而纓也毋泥而足也大白若辱兮又何
之濯爲詞舉音息登岸捨舟一笑而別益歸人

竹山竹谿房縣游記

麋城介雍梁間萬山綿絡井里虛涼厥土瘠瘠
寔爲楚郡十五城之寢丘也其民罷敝其習固
陋其俗悍慄其屬邑曰竹山曰房縣曰竹谿壁
鄔益深土風益朴竹山爲古上庸地房縣爲古

房陵州 國朝成化間竹山流寇嘯聚官軍討平之因割其壤設令尉爲竹谿縣竹山之鎮爲霍山庸水出焉房陵之鎮爲天馬沮水出焉南經於郢俱入於江其地憑高負險谿澗盤結澗水噴薄勞洑瀾騰濁流一石厥泥數斗土人汲飲項下多癯男女半之甚至大者如甕盎國人弗之覺也出見賓客其脰爲肩其種藝宜薏菽黍粟巨勝吉貝其方物多竹萌葛蔓野繭白蠟密脾麝臍狐白麀鹿猿熊虎豹之屬利甚饒而土著莫之享也四方流寓黠商雜處諸邑咸操錢刀鹽布俟土人窘甚輒應之居數月盡箕歛其方物之它郡得子錢浮於母錢幾三倍商日益衆家於境內者以萬計剝削滋甚民力日敝有司莫之誰何有司稍加擯抑商資弗出土人食貨弗通公私交困於是黠商更得畢持其籌箸蓋土人不自覺其日搜其精髓而更倚以爲命可嘍也其形勝爲千佛巖千人洞白雲厓東岳廟靈泉寺學堂古洞觀音閣元和觀其險絕

爲黃茅山岳州山八道河七十二渡女兒厓閭
王匾曲尺山石纏嶺其古跡爲呂巖洞殷家井
安期足跡黃香故居尹吉甫冢廬陵王墳至若
萬嶂韜霞千峯虧日谿澗映帶洞壑豁豁觸目
會心類多可悅不幸處於閭昧之鄉闕焉無考
吏茲土者不悲愴於山木謳吟之感則絕聞於
蓬藿楚然之音卽加標目誰與相賞是以往往
鞠爲灌莽世竟無聞焉丙申七月初五日余因
竹山李洞南竹谿沈華石兩令君之招發自麋

城得恣搜覽肩輿上下登頓千餘里至是月二
十四日復還麋上歷志經歷之處覽其人民皆
編茅爲室不蔽風日星離雹布山谷中男女椎
髻裹以花悅樵蘇耕耨雜處田間晨夕饗餐止
於麥飴豆羹而已其窶者甚至麥屑糠覈野菜
半菽日不再餐乃視塩豉蒜韭不啻大牢之享
是以小人輕命或以一言之忿輒至自裁推原
其故寔以地不知有養生之樂生死等耳故閭
閻之間雉經仰藥沉淵者比比然也今大江以

南沃野千里泉貨輻輳汗牛炙轂貴介之子弟
驅堅策肥耳倦絲肉口飮膾炙身厭羅紈者眎
此殆有間矣然天道於人胡羸彼而詘此庸詎
知羸之非詘詘之非羸乎茲後也不獨攬結其
山水之勝而於編民之隱頗得其槩寔深有感
焉不可無記作游記

散花閣記

觀夢居士汨沒迷津望洋覺海五濁世界一切
煩惱居士嬰之者十五蓋賀焉二十年於茲罔

有聞也於是聞圓通大士從無數恒河沙劫發
菩提心以聞思修入三摩地三十二應觀聲揅
苦若諸菩薩進修無漏圓通現如來身而爲說
法令其解脫乃至有學宰官居士比丘比丘尼
優婆塞優婆夷種種等亦復如是居士發願皈
依大慈懺悔往業與以攝受庶幾其拯拔乎作
是思惟已澡心滌念昕夕頂禮是謹昔者富春
之役圓通施以楊枝法水度我於尼居士別有
紀歲乙未春居士徙舍華蓋之東偏地隸羶鄉

之聚魚塩輳集日與駟僮伍後有樓三楹稍靚
深以一楹藩爲二堵一以度儒書一以供大士
中設一燈一几一座無長物顧四周皆高垣無
所見居士從西向穿一牖隔垣碧桃一本當牖
前桃始吐花亭亭掩映几席間適赤城超如上
人造居士少選風瀏瀏吹花片穿牖入飛舞久
之下著上人衣居士戲曰結習盡者花不著身
上人結習固未盡邪因署其榜曰散花閣有間
上人登坐設難曰吾聞西方聖人住持圓覺清

淨妙明十方澈徹名相不立有無雙遣爾以通
塞明暗風動花翻觸塵緣影種種迷著居士無
迺自生分別乎居士矍然起曰夫道本無言微
言弗顯也言立而名相立矣山河大地妄想幻
結也而也漫假而居士也漫假而比丘也我與
若皆幻也卽幻卽覺幻覺不相勝我將幻覺兩
忘之而冥於道我將與若乘夫莽眇之鳥而游
乎太虛我將與若總轡乎圓頓之門而晏坐乎
大覺妙場相盡名滅翳盡花滅滅所滅滅滅滅

亦滅而則何如上人拈花而粲向居士曰如是如是乃下座

羅浮林氏霞舉序記

羅浮少南林君一日告予曰吾少有裘馬游閒之習子之所知也中歲一切悉屏去獨好堪輿家言爲益甚乃於玄女榜里希逸景純之秘青烏白鶴金函玉髓之編靡弗殫精劇心以臻其寘已復縱觀寓內名山川以證我之所究犁然若有合也比券得竹浦霞嶼一席地原其來龍

騰驤飛舞數百里若十萬戈中旌幢捧擁而來中繇郭溪天長嶺分脈自兌而亥開障結穴其法負子而向午上合天星紫微之垣予登穴四顧則若獅若象若箱若印曰天馬曰御屏曰捍門曰華表波譎雲詭森衛獻秀售靈於左右目不暇給予早晚將營玄宮焉子其爲我記之以詔來葉蘭陰王地師貌其大都題曰坎離交媾本乎易也夫易逆數也金丹地理悉準焉陰中之陽爲坎陽中之陰爲離逆者迎也迎則交不

迎則不交金丹之有鉛汞則嬰姤聖胎於是乎
孕地理之有龍穴則神秀英靈於是乎生逞昔
神聖冥察逖覽手握化機用能顛倒五行裁成
萬彙庸詎方技之末邪林君研精此道積有歲
時獨詣冥樞盡發玄鑰卽柄造物者終不能自
秘其靈君於茲山若取諸寄誰曰倖致者哉昔
司空圖預於中條山中爲生壙勝日引客舉酒
賦詩爲樂姚勗亦於萬安山麓營兆署曰化臺
茲皆古達人之致也林君年始望七神完而顏

澤旣能遠紹賢達之曠抱復爲昌後靈長之令
圖其識超超去人遠矣予戲謂林君曰自茲以
往閱百餘年君之孫子其麗不億將顯融昌熾
大而門閭光而泉壤異日報功上冢以修歲時
之祀君將汶汶漠漠與化俱徂乎將歷歷昭昭
有所獨存乎將翳芝蓋桂旗驟赤豹以遨乎將
託蟲臂鼠肝與委蛻以化乎將歆其羶薌而吐
之乎將其爲有知乎爲無知乎林君蹶然曰以
予今日之知欲溯往昔之知弗得也烏知後來

之知能知今日之知乎子第爲我紀其知者而
已其不知者子又烏能知予無以難也遂書以
爲記

